

# BUNZAMBÌ BUUMVWIJA



Twasakidila, Mwaneetu Carlson. Nya' nnwela peenu mwoyi nwênù bânà beetu baa balume ne baa bakaji badi bakwacila Mukalenge mudimu. Cidi . . . Misangu mikwabo ntu ngumvwa mwoyi mukwacidile ndambu bwa kjuuka, pândi nteeleja majaaniki malenga mushindu ewu, ne bikwabo, bu mûmvwà nteeleja mu dinda emu. Nenku pashiishe, mwena mwabo neetu mu ntatu ne dikengeshiibwa, mushindu udi mwaneetu wa balume ne mwaneetu wa bakaji baa ba-Baptistes aba babipete ewu; bu mûmvwà kumpala wa mu—wa mu ba-Baptistes, mêmè mwine, Baptiste Missionnaire, ne—ne bu mûndi mumanye cidibi byumvwija padi beena dyebe . . .

<sup>2</sup> Mêmè ewu ngâkapeta cintu cimwecimwe aci. Beena dyanyi biine kumbengabo, nenku biikâlè badyambidila ne bavwa mwa kungiipata bwalu mvwa mushaale mupâle. Kadi mêmè kujandula, bu mûntù anu ngenza kwamba bwalu ebun mu mushindu wa mwenze bu nyunguluka ndambu ne: “Piikalabi ne ndi mupâle, ndekelaayi, bwalu ndi ne disanka mu mushindu ewu kutamba pâmvwà ne mutu wanyi mwikâlè mu wôwò.” Pa nanku aci ncyenze bu kaalwidì kakese kântù mulame, kaanyi mêmè nkaayaanyi. Nenku—nenku ncyà bushuwa ne ntu ne disanka bwa cikondo eci—eci cya diikala mushindu ewu.

<sup>3</sup> Nenku mwaneetu mutekete wa mu Église de Christ udi mwaba ewu ewu, bu mutùtù tumubiikila pa ciibidilu, anyi wa ba-Campbellites. Nenku ndi mvuluka ne cya bushuwa bôbò ki bavwa batuuci banene baa bisuusu bwa kulwisha masangisha patucivwa tubangilaku. Kadi, nudi bamanye, tuvwa ne kampanda dyende Pôlo uvwa pende mushindu umweumwe awu musangu kampanda, kadi kulwa kushaalye umwe wetu. Pa nanku, ncyà bushuwa. Ngeela meeji ne cidibo bakeba bwa kumona pa ciibidilu nnsômbelu unudi nende. Nudi bamanye's, dibà dyônsò mbitambe bwîmpè kundeeja nsômbelu wa diyishiisha dyebe pamutu paa kudiiyiisha. Mêmè ntu . . .

<sup>4</sup> Kukaadi cikondo, mwambi munene kampanda, muntu mwîmpè wa Evanjeeliyo mu kaabujima, nwênù bônso—bônso nutu bamumanye, ngeela meeji, dyende n'Révérènd Booth-Clibborn, ùyiisha Evanjeeliyo mu myakulu mwandamutekete mishiileshiilangane. Cidiye naaci mmeeki matwe. Nenku mêmè . . . Mmuntu wa mpolondo pa bidi bitangila bwongo bwende. Nenku cikondo kampanda tuvwa twenda pamwe, ne yèyè ne Mwaneetu Moore ne mêmè, nenku tuvwa tukokangana pa cintu kampanda. Kadi mêmè mvwa luseke luvwa lubengangana nende, ki kukudimukaye e kuntangila. Yèyè ne: “Cyûdi kwèna mumanyeku Bible to.” Nudi anu bamanye mushindu utu Mwaneetu Booth mwa kubyamba awu.

<sup>5</sup> Mémè ne: “Ncya bushuwa, Mwaneetu Booth, kadi ndi mumanye Muenaye bîmpè menemene.” Nenku, nenku mémè ndi—ndi muswe. . . Nudi bamanye, kî nkumanya kwa Dîyì Dyende kudi kwikàle Mwoyi to, kadi, “kuMumanya Yèyè ki Mwoyi.” Ncya bushuwa. Nwamonu anyi? Nansha mémè mumanye Dîyì Dyende anyi to; kadi bu mémè anu muMumanye Yèyè! Nenku bushuwa aci m’Bulelela.

<sup>6</sup> Mvwa, mu dinda emu, ndabulangana ku cyanza ne beena kasumbu kalenga aka mwaba ewu, kaa bambi. Ne uvwa musòmbè mwaba ewu awu uvwa. . . Ncyèna ne meeji a kuvwija muntu kampanda wa ukoka ntema to. Kadi muntu wa bafiike ewu kubwelaye, mwaneetu, kusòmbayè mwaba awu. Mémè kwambila kaleeleki wanyi ewu ne: “Mwena Kilisto mulelela nyèyè awu.”

<sup>7</sup> Wèwè ewu utu umvulwija bikole Mukulu Smith uvwa mwena Église de Dieu en Christ, ngeela meeji. Mvwa ne ciibidilu cya kuyiisha bikole mwabo amu, kadi—kadi ncidi anu mmumona mu lungenyi too ne mpindyewu. Ûvwa mufwanangane ndambu ne mwaneetu udi apa ewu, cibi yèyè uvwa ne mwedi wa pa mushiku mwenze bu mufiikuluke. Mvwa mbwelela ku ciibi cya kumfundu, kadi ncitu mupweku mwoyi mèyì avwa mukulumpe awu ne ciibidilu cya kwamba to; ubanduluka, ne bansantu bônso munkaci mwa kwimba, nudi bamanye’s, ne kuvwa mwànà wa bakaji mutekete, uvwa pa ciibidilu, musòmbèle lwà mu disangu. Musambu wanyi wúmvwà mutambe kunanga uvwa wa ne *Mubàndishaaayi Yèyè Kuulu*. Bavwa bônso batuuta bikashi, mushindu wa cyena Mpenta awu, nudi bamanye’s: *Mubàndishaaayi Yèyè Kuulu*. Bavwa bannange, ne mémè mubanange. Ne patudi tubwela (Ûvwa ne ciibidilu cya kusòmba mwaba awu, ne mutu wende mushindu ewu, pa meesa, mwikàle anu ubabandila, nudi bamanye’s.), wamba ne: “Bwela, mukulu. Teeka cifulu cyebe aci.” Kabiye ne, “Sòmbelà panshi apu” to. “Teeka cifulu cyebe aci.”

<sup>8</sup> Mwaneetu wa balume ewu; ki mémè kuyiila, dîbà adi ne, umwe wa ku bimbi baanyi baa misambu ya Evanjeeliyo wúmvwà mutambe kunanga uvwa mmukajende. Ki mémè kwamba mèyì a malenga ônsò àmvwàku paanyi mwa kwamba awu, bwa kumufikisha ku dimba. Nenku, pashiishe, kulombaye bwa ne kabamubiikidi to, ne mémè ndi mumanye cidi aci cyumvwija. Kadi mémè mwine nèmmubiikilè, bwa kulwa kwimbaye, yèyè ne mushindu.

<sup>9</sup> Ee, wèwè kwèna mwaneetu wa bakaji wâkimba—wâkimba, *Màzuwà Afiki*, dinda kampanda mu cibilu cya beena Kilisto baa Kantu-ku-Byanza awu anyi, mpindyewu? [Mwaneetu wa bakaji udi wamba ne: “Eyowa’s, mukalenge. Eyowa.”—Muf.] Ndi ntekemena ne mukajaanyi neabande kuneeku mu lumingu emu, nenku ndi muswe akuteeleje, bwalu ntu mutambe kwela

mukana be. Nenku wêwè mupangile aci pa mukaba wa mêtî, netulongolole bwalu abu. Ntu munange ngimbilu mulenga awu.

<sup>10</sup> Nenku, mvwa anu ngambilambila bantu, ncivwa—ncivwaku mumanye mwa kwimba to. Kaa, ekelekele, mêmè's mvwa ntanta wa mùliyô mujima wa kilomeeta ne cyôci aci. Kadi mvwa ngamba ne: “Byôbî mwa kwenzeka ne uye mu Dyulu ne ukasombèlè mu nzubu webe munene wa bukalenge awu, udi mumanye's, muulu Mwamwa,” ngamba ne, “lwà kwînshi kwa kakuna kwaka, lwà mundekeelu mwa diitu mwamwa, kudi kazùbù kakese kaasa muntwamu. Ki kiikalà kaanyi mêmè. Nenku abidi adi panshi aa pawikala mupatuke musômbe mu lutanda ne wêwè kuumvwa muntu kampanda mwimane mwaba awu, wimba ne: ‘Ngàsà udi ukemesha! mushindu mwine wa bupole udi dîyî adi, dyakasungila mukengeledi wa luse bu mêmè!’ Wâmbè ne: ‘Nzambi atumbe! Ndekeelu wa byônsò Mwaneetu mukulumpe Branham wafiki pende kunu.’” Mêmè ki wîkala nteeleja kuntwaku, nteeta paanyi mwa kwimba's.

<sup>11</sup> Kùdi bânà beetu beena Kilisto, ne kùdi...Ngeela meeji ne mwaneetu kampanda mmutuleejeji, mu dinda emu, bu mwambi wa beena Bouddha, lwà mwaba ewu. Mwoyaawu, mulunda wanyi wa mushinga mukole. Ne mêmè mwine nkaadiku muyiikilangane bikole, kî mbya bipitepite to, kadi ne beena Bouddha; ne nangananga mu Canada, munkaci mwa ba-Chinois, mêmè kusangana ne mbantu baa dinanga dyâbûngi ne bupole.

<sup>12</sup> Ndi mvuluka mulume mukwabo mwena Bouddha wa mu ntempelu wa Bouddha, mulwe mu disangisha dya mu Winnipeg, mwikalè mpofo. Mbantu baa bakese bakese, bakese baa bupole, ne bavwa biitabuujja cya bushuwa ne Nzambi ki mwondopi. Nenku pâmvwâ munkaci mwa kumusambidila, ne yêyè wenda wambulula mêtî awu, mushindu uwwaye munange Nzambi, ki dyakamwe mêtî ende kutabalawu, mu...Nenku aci kadi kwikalaci cintu ci—cilenga cya dikema. Pa nanku, tudi—tudi twanyisha mulume yônsò ne muntu yônsò.

<sup>13</sup> Mpindyewu, ncitu mwanji kupetaku mpunga ewu kwônsò eku to, muneemu mu Chicago, bwa kuteeta kwakula...Byôbî biine, ncyêna muswe kuteeta kutwala diyîisha kampanda disunguluke to, bwalu bambi badi mwaba ewu aba mbantambe mêmè ne kule, ku ditwala dya diyîisha. Kadi, twamb'eku twamb'eku, kanwena mwaba ewu bwa kuteeleja diyîisha kampanda to. Kadi mêmè mvwa ndyambidila ne eci ncifwanyine kwikalaci cikondo cya butumbi bupite cya mêmè kupetaku mushindu wa kutuutakeena ne bambi baa mu Chicago, mu distriki edi, ne kufika ku ditamba kumanyanganaku naabo, ne tutambaku kumanyangana muntu ne mukwende. Ne ncyâ bushuwa ne ndi nsakidila Mukalenge bwa mpunga ewu. Bwalu, nkaadi mufikefike mu cimenga eci misangu ne misangu mwaba ewu, ku dintuudila dya mfranga dya kudi ekeleeziya umwepele, ne ku dintuudila dya mfranga dya kudi beena Kilisto baa Kantu-

ku-Byanza; nenku, nciyiku mpeta mpunga wa kudyakwila kumpala kwa cisumbu cya bânà beetu to.

<sup>14</sup> Nenku—nenku díbà adi mvwa ndyambidila, kabidi kudi bintu búngi cyanaana bidi bishindikija mudimu wa bwambi wa mushindu ewu, tuumaalu twa disunsulula, ne dipona ne dijuuka, mu mushindu wa ne misangu mikwabo mbipeepele bwa muntu kupetaye didifwikakajila didì kayi dyôdi to. Nenku ndi muswe kwangata tusunsa tukese tudi túlondà etu bwa kuteeta kuumvwija ne—ne kubitookeshila bânà beetu, kubitookesha mu mushindu wúndìku paanyi mumanye mwa kubyumvwija awu.

<sup>15</sup> Ne mêmè mwine ndi—ndi mushaadile ne nciyiku mukumbane bwa kwenza mu—muyiiki udi mufwanyine pâmwâpa kumweka wa meeji bwa bantu badi balonge tulaasa to. Mêmè ncyêna ne kalaasa kalonga to, ki cîndi mpangile. Kadi mvwa...ndi munange Mukalenge. Nenku Mukalenge mmumpe, pâmwâpa, mushindu mukwabo wa dipeta misuuka, ku dipâ dya Nzambi, bwa dyamonaku mwa kujika disoso didibo bashiye kudi civwa baanyi baledi bapange mwa kumpa aci, dindongesha dya kalaasa. Mupatukile mu dikù dya famiye wa balanda, dya bânà dikumi, ne tààtù mwikàle usaama, ki mêmè kupanga mushindu wa kulonga kalaasa. Nenku ewu, kadi, ku dilediibwa, kwakenzeka cintu kampana civwà... dilabula ne Nzambi, dya mààmù ne tààtù. Nwênù biine nukaadi babale bwalu bulonda bwanyi abu. Nenku, ku cyôci aci, ndi nteeta bwa kutwalaku kaanyi paanyi kantu, pamwe ne nwênù bânà beetu, bwa kukoka ne kufikisha bangenzâmpèkààtù kudi Kilisto. Nenku mpindyewu ndi . . .

<sup>16</sup> Ncyêna mwena diitabuuja dya bintu bya majimbu to. Kadi misangu yônsò, kumpala kwa kubuulula Dìyì, mêmè ntu muswe kwakula ne Mwenadi kakese. Nenku tudiku mwa kwinyika cyakabidi mitu yetu bwa katanci.

<sup>17</sup> Taatù wetu wa mushinga, Wêwè ki wetu Nzambi, ne nyewu tuseemena Kûdi bwa bwalu bwa Evanjeeliyo. Ndi mwaba ewu kumpala kwa bânà Beebe, bampaasata Beebe, ne bânà beetu baa diitabuuja dya mushinga wa mwomumwe ne dyanyi. Ne mushindu mwine udibi bitupisha mwoyi wanyi ne disanka pa kuumvwa bantu aba batubo bumvumvwe bibi, ne babatume mu mpitaadi ya masaama a mitu, bwa bwalu bwa Bukalenge bwa Nzambi; kumona mùdi Wêwè ubiikila bânà Beebe mu matuku a ndekeelu.

<sup>18</sup> Nenku tudi twitabuuja cya bushuwa, Taatù, ne tudi ne mwoyi kundekeelu kwa lubilu. Bu mwakamba muprofeta ne: “Nekwikale Bukênkè ku díbà dya diloolo.” Nenku bu mutudi twitabuuja ne twêtù ki badi bambudi baa Bukênkè ebu bwa Evanjeeliyo, ku ngàsà Webe, bùdi Wêwè mwanyishe bwa twêtù kuya naabu too ne kundekeelu kwa buloba, kudi ditabuluja edi diye.

<sup>19</sup> Nenku ndi ndomba, Taatù, ne, byumukila mu mwoyi wanyi, Wêwè witabe bwa ngambileku bânà beetu, mu dinda emu, kabingila ne kiipacila kaa nsòmbelu wanyi kùdì Wêwè, bwa bafike ku dyumvwa. Twènzèlèku ne, bwa twamonaku mwa kwikala ne dinanga dipwangane, ne dyumvwangana, ne dikwacishangana dya mu mudimu, mu mudimu wònsò wa Evanjeeliyo. Bwalu tudi tubilomba mu Dînà dya Yesu, Yèyè wâkalòmba bwa twètù kwikala umwe, muvwaye Yèyè ne Taatù Wende biikàle Umwe. Biikàle twitabuuja cyòci eci, ne: “Ku cyòci eci bantu bònsò nebamanye ne nudi bayiidi Baanyi, panwikala ne dinanga, muntu ne mukwende.” Amen.

<sup>20</sup> Mpindyewu anu. . . Nenku ndi mutekemene ne mwikale ne dyeyemena ne ncyèna nusuuya to nwènù bânà beetu baa balume ne baa bakaji, pa ciine eci. Kadi ndi ngeela meeji ne ndi njinga bwa kutookesha bìndì ngamba, mu mushindu wa kanuyiku mwa kuumvwa bidi muntu kampanda mukwabo mwambe to. Nenku nkaadi muumvwijumvwije, misangu ne misangu, mu masangisha makwabo a bambi, kadi ewu ngwanyi musangu wa kumpala bwa musùmbà wa mu Chicago, nenku ndi njinga bwa kudimanyisha bìmpè menemene, bwa cìndì nkeba kwenza.

<sup>21</sup> Mu Evanjeeliyo wa kale mubeneshiibwe ewu, mu nshapita wa 26 wa Mukanda wa Byenzedi, tudi tubala nunku:

*Pa nanku, Éyì mfumu Agrippa, ncyakashikuka ku cikeena-kumona cya mu dyulu to.*

<sup>22</sup> Ewu, mu bushuwa bwa bwalu, Pòlò ngudi wakula. Mùdìbi ne, twètù bònsò, bu bambi, tutu tujinga kumuteela yèyè, bwalu yèyè udi. . . Twètù, ne dîyì dimwe, tudi twitabuuja ne yèyè ki uvwa mupostolo bwa ekeleeziya wa baa Bisamba bya bende, ne Nzambi ngwâkamubiikila bwa kwikalaye nte—ntemu kudi baa Bisamba bya bende. Kadi mudimu wende wa bwambi bakaavwa bawela mpatà.

<sup>23</sup> Ne pa ciibidilu, padi cintu kampanda cya pabwaci cijuuka, batu anu bacyela mpatà. Cidi, ndi ngeela meeji ne ncyà bushuwa menemene; bitu bikengela anu bàcyèlè mpatà. Ne ndi ngeela meeji ne bampaasata mîngà misangu batu ne mwoyi mukwacidile bwa—bwa bintu bidibo bumvwa, ne mèmè ndi ngeela meeji ne badi ne bukenji bwa kwikala nanku. Bwalu, pândì mèmè ngumvwa nkudimwinu wa mwaku ewu *mpaasata*, ùdi uswa kwamba ne “mulami wa mikooko.” Nenku, ki bwa cinyi, yèyè mmu—mmu—mmudiishi, anyi mulami wa bimuna, wa cisumbu cya balume ne bakaji bàdì Nyuma Mwîmpè mumuteeke mutangidi wabo. Nenku udi ne bukenji bwa kumanya ne ncyakudya cya mushindu kaayi cidi mikooko yende yipeta, ne kudici mene cifumina mpenyi. Ndi ngeela meeji ne yèyè udi ne bukenji bwa kwenza nanku.

24 Nenku piikala mpaasata, anyi misangu mikwabo bantu, bafwanyine kumweka bu badi ndambu ne mwoyi mukwacidile, aci nanku, musangu nansha umwe, kabivwa bikengela citacishe muntu nansha yêyè nganyi to. Bivwa bikengela anu citwale kaneemu mu mwoyi wa muntu, bwa muntu wa kudibo, wa cipidi aci, udi mufwanyine kucyela mpatà awu. Nenku, twamb'eku twamb'eku, pawikala kuyi mutwishibwe ne udi mululame bîmpè mu njila, mmunyi mùdîku mufwanyine kwenda ku diitabuuja?

25 Pawikala uditeekela mu meeji ebe ne . . . Mpindyewu, eci cidi cimweka bu bintu bya mu meeji's; cidi cifwanyine anu kwikala cyôci, mene ncyôci, kadi bidi anu bîmpè. Kadi ncy bushuwa ne, mu mwoyi webe amu, udi mufwanyine kwela meeji ne kuvwaku mufwanyine kuujuuka ku meesa aku to, pâmwâpa kuvwa anu mufwanyine kukujuuka to. Nwamonu anyi? Bikukengela . . . Mbipeepele anu peepelee mushindu awu.

26 Bikengela witabuuje. Bikengela wikale ne diitabuuja. Bidi bikengela wikale ne dyeyemena. Kadi mmunyi mùdi mwa kwikala ne dyeyemena mu cintu paudi—paudi kuyi nansha mumanye kûyaayà kwine ne nkwèpi? Mmunyi mùndi mufwanyine kwenza lwendu mu njila wùntù nciyiku mwanji kwendela kacya kwônso eku, ngenda nyeemesha lubilu lwa lukole lwa njiwu, ne mu bibèndà mwônso amu, nciyi mumanye ne mu cibèndà cidi cilondà mudi cinyi? Bikengela umanye kûyaayà kwine ne nkwèpi, bwa cyanaana kwèna mumanye mwa kwenda to. Nenku mushindu awu nguvwa ukengela bwa muntu yônso kwikalaye. Ne pashiishe paudi ne mushindu, ucimona, ciikàle cikubuulwila, ne wèwè mumanye kùdi wenda uya aku, dîbà adi cintu nansha cimwe kacyakukwimanyika to.

27 Nenku, ngeela meeji, Pòlò, ki civwaye uteeta bwa kwambila Agrippa mwaba ewu. Ne, yêyè—yêyè wakabambila ne: “Musangu kampanda mvwa umwe wa kunùdi.”

28 Nenku ndi mèmè ncinka, pâmwâpa ne, piikalà—piikalà mwaneetu wa ba-Baptistes ewu, bu yêyè mwa kuya ku ekeleeziya wa ba-Baptistes mu dinda emu, yêyè ne mukajende, ncifwanyine pâmwâpa kwikala bujaadiki bwabo. “Musangu kampanda mvwa—mvwa umwe wa kunùdi.”

29 Anyi, Église de Christ, anyi mwa—mwaneetu wa balume wa ba-Campbellites ewu, mufwanyine kuya kudi—kudi beena dyende abu. Ngeela meeji ne batu bamwinyike dîna dya ditambe bwîmpè; Bayiidi baa Kilisto, mudibo bamubiikila, kadi mu bushuwa bwa bwalu mbwa dilongesha dya Alexandre Campbell. Ki pashiishe Église de Christ kuumukaye kunudi, bwa bwalu bwa mijiki. Ncy bushuwa, kî mmwômò anyi? Nenku bu yêyè mwa kwalukila kudibo, mmufwanyine kwamba ne: “Musangu kampanda mvwa wa kunùdi.”

30 Nénku Pòlò mwaba ewu udi walukila kudi Mfumu Agrippa, ne Festus, wamba ne: “Musangu kampana mvwa wa kunudi. Mvwa Mufaalesa wa Bafaalesa.” Ûvwa mukolele ku makàsà a Gamaliele, mulongeshi munene, ne ùvwa mumanye tunungu ne tukenjikenji twabo twònsò, ne bivwabo biitabuujà ne bivwabo kabayi biitabuujà abi. Yèyè ne: “Bya bwalu ndi mukengeshe ne Ekeleeziya wa Nzambi too ne ku lufu.” Nwamonu anyi? Yèyè ne: “Cintu ciine cidibo bangeelela mpatà eci, ki címvwà mèmè ewu mukengeshi waci.”

31 Ne ntu anu ndyambidila ne lufu lwa Stefano luvwa ne cya kwikala lulenge Pòlò, bwa paakamonaye mmwenekelu wa butumbi awu pa mpala wa Stefano. Paakatangilaye muulu, manguluba paawu amutuuta too ne ku lufu, ki yèyè ne: “Ndi mmona Yesu mwimane ku dyabalume dya Nzambi.” Nénku nudi bamanye’s, nudi mwa kushipa musanjeela, kadi kanwena mwa kushipaku mukenji wende to. Nénku mukenji, nansha muvwa Stefano muye bwa kiimana ku luseke lwa Yesu amu, nansha nanku, mukenji wende wakatungunuka, bwalu Pòlò wakatungunuka anu ne kuwamba, ne, cya ne, yèyè ki “mutambe bukese” wa kudibo, ne kavwa mukumbanyine kubiikidiibwa umwe wa kùdibo to, bwalu ùvwa mudimwene ne—ne mwitabe bwa kushipabo muntu wa difwana dya Nzambi awu.

32 Ki bwa cinyi, Pòlò, anu mùtùbi bikengela bwa bantu bònsò kwikalabo benza kumpala kwa bantu amu, Pòlò udi wangata dilabula dyende—dyende, udyaluja, kutwadijila ku cibangidilu, ku ciwaye; ne pashiishe uditeeka ne udijaadika pa Mufundu, bwa kuleejaye ne ciwaye wenza ciwà ncyà mu Mifundu. Nansha muvwaci cibengangana ne bivwabo bòbò biitabuujà amu, nansha nanku ùvwa anu ubaleeja ne ciwà m’Mufundu.

33 Ki bwa cinyi, ndi ngeela meeji ne twètù. . .Cintu kana cyònsò, anu mùnkaadì mwambambe misangu yàbùngì, bàna beetu, nwènù bàkaadì babwelebele mu masangisha abu, ne, dîbà dyònsò didibo anu mwa kupeta ne ndi mwambe bintu bidi kabiyi bya mu Mifundu, dîbà adi ndi ngeela meeji ne ncyà bushuwa ne. . .anyi mwaneetu mukwabo kana yònsò, bivwa bitukengela muntu ulwa kudi mukwende ne: “Aci kaciyena cisanganyibwa mu Bible to,” nwamonu’s. Piikalaci mu Bible, wèwè udi mufwanyine kwikala ne dyumvwija dishiilangane; kadi, cidi, piikalaci mu Mifundu, abi kaayi mbilenga.

34 Mpindyewu, Pòlò uvwa ufila dyumvwija dyende yèyè dya ciwà muprofa mwambe, ne ciwà Mòsà mwambe ne, ncivwa munkaci mwa kwenzeka aci. Ne yèyè wakatuutakeena ne Yesu mu njila, mu cikeena-kumona. Ki Yesu ewu kumubiikila.

35 Bwa aci, kacivwa mwa kwikala cintu cikole bwa beena Yuda abu to, mwakambaye ne: “Wa kuneemekiibwa bitambe Festus,” ne—ne bikwabo, ne. . . “mbifwanyine kwikala cintu cya cikemesha bwenu nwènù, bwa Nzambi mufwanyine kubiisha

bafwe anyi?” Nwamonu anyi? “Bwalu bu nwênù bamanye civwa Nzambi mwikàle kale wawa, ku—ku Mifundu, ncyà bushuwa ne nudi bafwanyine kumanya ne Yêyè udi ne bukole bwa kubiisha bafwe.”

<sup>36</sup> Ki pashiishe kwambaye, ùkaavwa mumane kubalondela dilabula dya mu njila wa ku Damaseke, dya bivwa byenzeke abi, bwa ne, yêyè abamanyishe ne Yesu ewu uvwabo—uvwabo bajuudile cimvundu bûngi cyanaana bwa pavwaye uCiyiisha, ki Nzambi mwine uvwabo bakwacilekwacile mudimu dîbà dyònsò awu. Bwalu, Yêyè nguvwa naabo mu cipeela awu, Wâkabàlombola awu, mwikàle Bukênkè abu; Kapyà, Dikunji dya Kapyà dyàkabàlombolà adi. Nenu Yêyè ki uvwa mumwenekele Pòlò mu cintu cimwecimwe aci, Bukênkè abu cyakabidi, bwàkamufomijà abu. Ki kwelaye lukonko ne: “Wêwè udi nganyi, Mukalenge?”

<sup>37</sup> Ki Yêyè kwamba ne: “Ndi Yesu, ùdi ukengesha awu. Kadi mbikole bwa wêwè kukandamana cyanaana.”

<sup>38</sup> Nenu ùvwa uteeta bwa kubumvwija ne civwa ncinyi, ne—ne ùvwa uteeta bwa kubalongesha ciine aci, civwaye uleeja bantu aci, ciikàle anu, cya ne: “Yesu Kilisto ki uvwa Maasiya awu,” kabidi ne, “Yêyè uvwa mufwe, kadi Nzambi muMubiishe ku lufu.” Ne ciine aci civwa bilondeshile Mifundu. Kabidi ne: “Ùkaavwa mpindyewu mubànde mu Dyulu, kudi Nzambi Taatù,” ne—ne yêyè uvwa ntemu wa dibiika Dyende dya ku lufu. Kabidi, ne, bishima ebi, ne bimanyinu, ne maalu a kukema, biine bivwà bya bikèmesha kumpala kwa bantu abi, kabivwaku cintu cya cipyacipyà to, bwa mwena kwitabuuja mulelela wa Mifundu, bwalu Bible ukaavwa mubyàmbè.

<sup>39</sup> Tangilaayi kale mu baprofeta, mushindu uvwaci cyambe mu ciprofeta, bwa ne, ku dilwa dya Maasiya, civwaYe mwa kwenza: “Balema bavwa mwa kutupika bu kashà kalume,” mu Yeshaayi 35 ne Mifundu mishiileshiilangane yivwaye mwa kwikala muteele ayi. Katwena naabi bifunda mwaba ewu to, kadi pàmwàpa kwalukilaye ne kuyiteelaye mu kaamuyiiki kende kîpî kaa kumpala kwa bamfumu abu aku; bwalu, mîngà misangu bôbò kabavwa bafwanyine kwikala nende lutuulu munudi nwênù naalu kùndì mêmè emu to. Pa nanku, ne pashiishe ùvwa—ùvwa munkaci mwa kubumvwijaci, ne mwikàle uteeta bwa kubambila ne Nzambi mwine uvwabo bakwacila mudimu awu. . .

<sup>40</sup> Ki pashiishe, cyakabidi, yêyè kwamba ne: “Mu njila udibo biinyike ne n’*dipambuka* awu,” mbwena kwamba ne, “mupâle,” nwamonu’s. “Njila udibo biinyike ne ndipambuka awu, mushindu awu ki wùndì nkuukwila Nzambi unudi nukuukwila awu.” Nwamonu’s: “Mu njila udibo biinyike ne ndipambuka awu.”



41 Ndi mutwishii bwe, leelu ewu ne, bu twètù mwa kwimana pamwe ne ekeleeziya yituvwa tusanganyiibwamu kumpala, bu mudi wa ba-Presbytériens, wa Katolike, wa ba-Baptistes, ne mishiileshiilangane ayi, tudi bafwanyine kulonda bujaadiki bumweumwe abu kudi bantu batu bamba ne batu baswe, Cileejilu, kwela mwaneeu mu cibambalu cya lupitaadi lwa beena masaama a mitu, anyi cintu cya mushindu awu. “Mu njila udibo biinyike ne ndipambuka awu, mushindu awu ki wùndi nkuukwila Nzambi wa baataatù beetu.”

42 Kadi mbujaadiki bunenaanenaale kaayipu bùvwà kumpala kwa Agrippa abu, byenze ne nansha muvwabi munkaci mwa muiyiki wende amu, Agrippa kwelaye lubila lukole, kwamba ne: “Pòlò, Shawula, s’udi mufwanyine kufika ku dintwisha bwa mêmè kwikala mwena Kilisto’s.” Nwamonu’s, mushindu awu, wakawala Mifundu mu mushindu mutooke menemene, nansha muvwabi bibengangana ne nsunàngòngà wende sungasunga amu. Kadi Mifundu yivwa mitooke mipwangane mu mushindu wa ne, yêyè wakamba ne: “S’udi mufwanyine kufika ku dintwisha bwa mêmè kwikala mùdi wêwè amu’s.”

43 Pòlò kwamba ne: “Mvwa mwa kujinga ne wikale nanku, menemene, kadi ncyêna mufwanyine kujinga bwa wêwè kwikala mu nkanu mùndi mêmè emu to,” nwamonu’s, kadi bwa kwikalaye mwena kwitabuuja muvwaye yêyè amu. Mu ngaakwilu mukwabo, bu mêmè. . . “Mvwa mwa kujinga ne Nzambi ênzèku ne wêwè umone dibuulula bu—bu mùndi mêmè ndimona emu.” Mu ngaakwilu mukwabo ne: “Mvwa—mvwa mwa kujinga bwa wêwè kwenza cyôci aci.” Nwamonu anyi? “Cîndi njinga cidi anu bwa ne wacyenzaku.”

44 Piine apu, mpavwa Festus, ngeela meeji, mumwambe ne ùvwa “mulonge bintu bipitepite bùngi,” ne ùkaavwa ne “mutu mumunyunguluke.” Kadi yêyè kumwambila ne kavwa—kavwa nanku to; ne ùvwa—ùvwa mumanye pavwaye mwimanyine.

45 Nenu ndi mufwanyine kwamba nunu, mu dinda emu, nwênù bânà beetu. Mvwa mwa kujinga menemene ne ngiikale. . . Nciyi ndifwanyikija ne nsòmbelu wa Pòlò to, kadi anu bwa kufila kaamuyiiki kaa kapepele cyanaana. Bwalu, kudi bakwabo bààbùngi mwaba ewu biikalà pàmwäpa ne cya kwakula mu dinda emu, kadi mvwa muswe bwa mu mpunga ewu ngâmbè eci. Mpindyewu mvwa mwa kujinga ne umwe ne umwe wa ku ekeleeziya mishiileshiilangane, bu mûngûmvù nuyiteela emu, Temple Bethel, Indépendant, Assemblées de Dieu, ne mikwabo mishiileshiilangane. . . Mvwa mwa kujinga ne bônso abu nupete mushindu wa kumona cîndi mêmè mmona eci; bwa nupete mushindu awu. Mvwa mwa kujinga ne nupete mushindu wa kumona cikeena-kumona cîndi mêmè mmona eci, díbà adi nudi bafwanyine kwikala ne dyumvwa dya ditambe kwikala ditooke, dya mudimu ewu wa bwambi.

46 Pângààkuumukà mu ekeleeziya wa ba-Baptistes, bwa kulwa kubwela mu mpenta; nenku Docteur Roy E. Davis, mwine wâkanjidila mu église Baptiste Missionnaire awu, ùvwa mungambile ne mvwa mupete cilootaloota, pààkalwà cikeena-kumona cya Mukalenge ne—ne kwakula naanyi apu. Nenku—nenku nudi bamanye civwa dyondopa mwine musangu awu, divwa mu mushindu wa mupweke be.

47 Ne—ne mêmè mwine ncivwaku mumanye cintu pa bivwa bitangila beena Mpenta to. Mvwa ngumvwa bamba ne bavwa mmusumbà wa bansantu babunguluki baa mu malaba bavwa balaala panshi bamacisha nta ku mishiku bu mbwa mipâle, ne bivwa bikengela kubeelabo lupeepele bwa kubafuululula, ne byônsò bya mushindu awu. Ki cyônsò cìmvwàku paanyi mumanye pa bivwa bitangila beena Mpenta ncyôci aci.

Yèyè ne: “Udi wela meeji ne wâkutèèleja wêwè ewu mwine ki nganyi pende?”

48 Mêmè ne: “Piikalabi ne Nzambi ngudi untuma, s’kudi mwaba kampanda ne muntu kampanda kùdiYe ùntùma.” Ncya bushuwa. Nwamonu anyi? “Bwalu,” mêmè ne, “Docteur Davis,” mêmè ne, “Yèyè’s uvwa anu wetu wa cya bushuwa ewu; mvwa mwimane muMutangile,” ngamba nanku. Bôbò bavwa bangambila ne bikeena-kumona abi . . .

49 Mêmè ewu ndi mwena kwitabuuya munene, bânà beetu, wa ne—wa ne mapà ne mabiikila kî mbya dinyingalala to. Ki mûntù mêmè—mêmè ngiitabuuya nanku. Wêwè udi mulediibwe, kwèna mwa kwikala cintu kampanda cyûdi kuyi to. Nenku dîbà dyônsò dyûdi uteeta kudivwija cintu kampanda cyûdi kuyi to, udi anu ukwata mudimu wa mwena lubombo. Nenku Nzambi itabeku mfwe kumpala kwa mêmè kwikala mwena lubombo, nwamonu’s. Ngiikale anu cîndi eci, nenku pashiishe ncivwije citooke tòò. Nenku—nenku, pashiishe, ngiikaleku—ngiikaleku mushindu awu, ne dîbà adi bantu bônsò mbamanye nanku awu. Dîbà adi nudi numanya anu mudibi menemene.

50 Pa nanku mpindyewu, bu munutu bamanye amu, ncitu mulonge kalaasa kààbûngì to, bu mûngâmbì. Pa nanku mu dyanyi . . . mu teoloji, mêmè kadi ki mutambe kwikala mushaadile udiku. Ne ndi ngeela meeji ne nutu bamanye aci, nwamonu’s. Kadi mêmè bu muyiishi, ncyèna mufwanyineku nansha kwikala cibwîpi ne kudibiikila ne ndi muyiishi to, bwa dipanga kulonga kalaasa ne dimanya dya myaku, ne bikwabo. Kadi kakese kândi paanyi naaku aku, bwa . . . pa bidi bitangila dyanyi dimanya dya kumanya, ku ngâsà Wende, Mukalenge Yesu, ndi nteetaku kwabanyangana byôbì abi ne bânà beetu bônsò mu myaba yônsò, bwa kwabanyangana cyôci eci.

51 Nenku, kadi, pângààkuumukà mu ekeleeziya wa ba-Baptistes . . . yèyè awu ki ekeleeziya umwepele ûnkaadiku mubwele, anyi mwakanjidilabo. Nenku baakanjidila mu cidimu

cya 1933, mu église Baptiste Missionnaire, mu Jeffersonville, mu Indiana. Yèyè awu ki—ki . . . utu cidimba cya Cibilu cya ba-Baptistes baa ku Sud. Nenku twêtù, mu eci cikondo, mèmè . . . pângààkapàtukà ne . . .

<sup>52</sup> Mpindyewu, ekeleeziya wa ba-Baptistes utu ekeleeziya mudishikamine. Twêtù—twêtù bônso tutu bamanye ne, ne yèyè utu—yèyè utu . . . Wèwè udi mwa kuyiisha cyônso cyûdi muswe kuyiisha aci, piikalà disangisha dyenu dicitwa nyama ku mikolo. Badi anu . . . Udi ujinga kuyiisha cyônso cyûdi muswe.

<sup>53</sup> Nenku mèmè ntu muswe aci, nwamonu's, bwalu ntu ngiitabuuja ne ki cidi cya bapostolo. Bwalu, mutu, mulongo udi mutambe kutumbuka mu ekeleeziya, mmulami wa mikooko, bwa aci tudi bamanye, mpaasata. Nenku—nenku piikalà mu—mu . . . Piikalà mwepiskopo kampanda anyi muntu kampanda mukwabo ujinga kunyenga mpaasata dilongesha dyene, dîbà adi mmunyi mwikala Nzambi mwa kukwataku mudimu mu ekeleeziya wende awu? Nudi numona's, kanwenaku mwa kucyumvwa to. Pa nanku, ne mèmè ndi ne . . .

<sup>54</sup> Pângààkapàtukàmu, ngàkapetangana ne musumbà wa kumpala, civwa ndyondopa dya Betty Daugherty mwànà, mu St. Louis, mu Missouri. Nenku uvwa ng'église Pentecôtiste Unie, anyi ekeleeziya wa Dînà dya Yesu wa beena Mpenta, ne mpaasata ewu uvwa wa mwômò amu, nenku mwanende mukese wa bakaji kwondopiibwaye. Bwa kwamba menemene, mèmè mvwa ndyambidila ne ki cyôci aci cyàkamuvwijà mwena mpenta, mbwalu bavwa badibiikila ne, "Yesu Nkaayende." Nenku mèmè kudyambidila ne ki cyàkabàvwijà beena mpenta, civwa mbwa civwabo badibiikila aci, ki civwa dishiilangana ndyôdi adi. Pa nanku, ee, pashiishe pângààkuumukà amu ki mèmè kuya ku . . .

<sup>55</sup> Nenku muntu kampanda wa maalu mîmpè be; twêtù twenza disangisha dinene mu St. Louis, fôtô wadi mmupatuke muntwamu. Nenku twêtù kupeta nzubu wa dibalaasa wa Kiel Auditorium; nenku diloolo dya ntwadijilu, anyi diibidi, muvwa bantu binunu dikumi ne binaayi bavwa batantu, ne katuyiku nansha mwa . . . bikengela kuteeka bampulushi pabwîpi ne ku biibi, bwa kusaka bantu kule.

<sup>56</sup> Ki pashiishe nguumuka aku, mpweka nya kudi Richard T. Reed, wa ku Bible Hour Tabernacle mubènesha wa kale awu, mu Jonesboro, uvwa mwikàle pende anu wa bulongolodi bumwebumwe abu. Nenku nguumuka aku, nya kudi Dr. G. H. Brown, bulongolodi bumwebumwe abu, mu mùsèsù wa Victor Street 505 mu Little Rock, mu Arkansas. Nenku, nguumuka aku, mèmè kuya ku Côte Ouest.

<sup>57</sup> Nenku pashiishe pângààkafikà ku Côte Ouest, ki mèmè kutuutakeena ne kapyà. Dîbà adi ki mèmè kujandula ne kuvwa matapuluka bûngi cyanaana munkaci mwa beena mpenta,

mu malongolodi abo amu, anu mutudi twètù ba-Baptistes naawu amu. Nwamonu's, bavwa—bavwa ne mashiilangana mapite, àvwàmu awu, bavwa naawu mashiileshiilangane. Kuvwa Assemblées de Dieu, ne Église de Dieu, ne cintu kampanda cikwabo, ne cintu kampanda cikwabo, ne cintu kampanda cikwabo, ne—ne dishiilangana adi's. Nenku bavwa batapulukangane, badyèlèle ne tuumikalu tukese tukese. Ki bânà beetu bakwabo bônso kubangabo kundwila, bangambila ne: “Mona's, wèwè's udi mwena Yesu Nkaayende, ne cisumbu cidi apa eci.”

Mémè ne: “To, nci tu—nci tu mémè ndibiikila nanku to.” Nwamonu anyi?

Yèyè ne: “Ee, kadi's nyewu udi muswikakane naabo.”

<sup>58</sup> Mémè ne: “Ee, aci—aci kî nci di cimvwija cyôci aci to.” Nwamonu anyi? Ki mémè ne: “Ndi—ndi—ndi anu... Bôbò's bavwa anu bânà beetu.”

<sup>59</sup> Ki yèyè ne: “Mona's, bôbò's mmusumbà wa... Mona's, kabeena ne cidibo naaci to anu musumbà wa mici ya kwikilabo kudi tubangu-nyuunyi ne bikwabo, eku ne eku, mushindu awu. Nkwèpì...”

<sup>60</sup> Mémè kwamba ne: “To, kwambi nanku to. Ntu ntutakeenamumu ne bantu baa difwana dya Nzambi dya menemene. Kabidi mbantu baa Nzambi.” Ki mémè ne: “Ncya bushuwa ne bidi bintacisha mémè—mémè ku mwoyi bwa kubabiikila ne mbabi; bwalu, kî mbabi to.”

<sup>61</sup> Ee, mémè kuteeta bwa kushaala mukwate ku cyôci aci ntanta ûmvwà paanyi mukookeshe awu, nciyi mwa kwamba ne ndi eku anyi eku to. Ee, ki mémè kubanga kulonga bwa kumona ne mmwenenu yabo yivwa bishi, ne matapuluka abo avwa ngaa cinyi, ne ciine civwa cibatapulule ncinyi. Ki mémè kujandula ne bibidi bya ku bisumbu bya binene abi, cimwe cya ku byôbì, bavwa bacibiikila ne Yesu Nkaayende, ne cikwabo bacibiikila ne Assemblées de Dieu. Nenku bavwa bapàtùke, anyi batapuluke, mbwa cilumbu cya dibatiiza dya mu mâyi; cimwe cikwata mudimu ne “Taatu, Mwânà, Nyuma Mwîmpè,” ne cikwabo cikwata mudimu ne Dînà dya “Yesu.”

<sup>62</sup> Ee, mémè kutangila, ku nseke yônso yibidi kuvwa bantu banene, basadidi baa Nzambi. Ki mémè kudyambidila ne: “Éyì Nzambi wa yaaya, ngaamonapu bwônso bwabo batundubuka mu... baya anu kumpala ne bapeta... kadi kabayiku anu beelelangana mikalu yabo ayi, bamba ne: ‘Katwena baswe kwikala mu bwobumwe muntu ne mukwende to.’” Kadi ki mémè kujandula, mu cyôci eci ne, nyuma mubi ukaavwa mubwele munkaci mwabo ne mufile lukinu ne budimu, mubwelele pa tulumbulumbu tuvwa tulwe munkaci mwabo atu. Mémè kudyambidila ne: “Ki cidi dyabulu ujinga menemene ncyôci aci. Anu aci ki cidiye ujinga.” Padi anu bingoma byenu nwènu

biikàle nubyasangana nwênù nkaayeenu muntu ne mukwende, yêyê kênàku ne bwalu bwa kulwangana mvita to nansha kakese. Ki mêmè. . .

<sup>63</sup> Ki pashiishe, ndekeelu wa byônso, kukafikabi too ne ku diteetangana dya makanda. Ne diteetangana dya makanda adi kwenzekeladi ku Seattle, mu Washington, bu mu cidimu cya 1946 nanku awu. Ki dinda kampanda divwabo baye naanyi mu mwaba wa dindila wa nzubu kampanda wa cilaala-beenyi, cintu cyenze bu mudi mwaba ewu, mwikàle di—didya dya dinda dya bambi kampanda. Nenku bivwa bikengela mêmè ngaakule ne bantu babidi bavwa baa banene.

<sup>64</sup> Nenku umwe wabo uvwa Docteur Ness. Ngeela meeji ne nwênù bânà beetu baa Assemblées de Dieu nudi bamuvuluke. Ûvwa yêyê mu citupa cya buloba cya ku Nord-wesete; muntu munene, wa meeji matwe, mumanyi wa dibàla. Nenku uvwa yêyê uleeja mpala bwa Assemblées de Dieu.

<sup>65</sup> Ne pashiishe, Docteur Scism, wa mu église Pentecôtiste Unie. Ngeela meeji ne nwênù bânà beetu beena église Pentecôtiste Unie nudi bamuvuluke. Ûvwa pende wa mu bitupa bya buloba bya ku Nord-wesete aku, yêyê ki uvwa kumutu kwabi ne distriki ya kwine kuntwaku.

<sup>66</sup> Ee, ki bantu babidi abu kutwilanganabo. Nenku bivwa bikengela balwe naanyi bwa kukungamangana naabo bôbò, bwalu ci—cilunji civwa cyenda cibànda cyamba kudya mici, ne mêmè ki uvwabi bilwisha nseke yônso. Ki mêmè kudyambidila ne: “Cîndi ne cya kwenza ncinyi? Cîndi mwa kwenza ncinyi?”

<sup>67</sup> Mpindyewu, ee, kwambabo ne: “Ee, bûdi naabu mbwa kwangata luseke lwa ewu anyi lwa wawa. Pawikala wenda ne beena Dîna dya Yesu, bikengela wikale mwena Dîna dya Yesu. Kadi wêwè wenda ne beena Assemblées de Dieu, bikengela ulekele beena Dîna dya Yesu, wikale mwena Assemblées de Dieu, anyi ne bikwabo.” Kufikabi mu mushindu wa ne mêmè ndileeje mu mushindu kampanda.

<sup>68</sup> Mêmè kusambila bikole mu dinda amu kumpala kwa kuyaku. Mêmè kwamba ne: “Nzambi, unkwacisheku. Bwalu, nyewu kudi bantu babidi banene; kudi binunu bya basadidi. Kadi Wêwè nyewu udi muntume bwa mêmè kulwa mwaba ewu ne mudimu wa bwambi. Ne bônso babidi nyawu mbasadidi Beebe. Nenku bidi bikengela bwa mêmè kwangata bwenzeji bukesa bûndi naabu ebu bwa kubwèlela bulongolodi bumwepele padibu bwikale bulwishangana ne bukwabo anyi?” Nwamonu anyi? “Ncyêna—ncyêna anu mwa kudyumvwa bîmpè to mu kwenza kwa nanku awu. Ncyêna ngela meeji ne aci ncifwanyine kwikala diswa dya Kilisto bwa mêmè kucyenza to.” Ki mêmè kwamba ne: “Nzambi, unkwacishe umpeesheku cintu kampanda cîndi mwa kwenza, anyi umpeesheku cintu kampanda cya mêmè kwamba.”

69 Nenku pa dībà adi ncivwa ne muntu nansha umwe to. Byakakengela anu bwa mèmè kushaala mwimane mwaba awu, anu Mukalenge Yesu ne mèmè, mu dinda amu.

70 Ee, kadi ki dikokangana dinene kubangadi. “Newènzè cinyi? Ndipangadika kaayi—kaayi—kaayi diwangata?”

71 Mèmè ne: “Dyanyi dipangadika ndimana kwangata. Ndyà ne, dyanyi dipangadika ndya kwimana pankaci peenu bõnsò babidi, ne nciyi nshaala mwena bulongolodi nansha bumwe to; nenku kwamba, ne maboko manwela bõnsò babidi kunshingu ne: “Tudi bânà baa muntu.” Nwamonu anyi? Nwamonu’s, tudi bânà baa muntu. Nwamonu anyi? Ki mèmè ne: “Ndi muteete kubala mikanda yõnsò yimvwàku paanyi mwa kubala ayi, bwa ne bwalu ebu mbujuuke bishi, civwabo babiikila ne ‘cilumbu cipyacipyà’ eci ncinyi, ne mushindu udibo batapuluke, ne mwàkabangà ewu mushindu *kampanda* ne mushindu *kansanga*.” Ki mèmè ne: “Mu makokyanganyi adi munkaci mwenu aa,” mèmè ne, “cintu cimwecimwe aci ncyàkafilà matapuluka mu nkwaka wa cyena mpenta, mu dituku . . . paanyima paa Mpenta. Baakabanga kukokangana munkaci mwabo.” Ki mèmè ne: “Cintu aci ncìcìdi anu citapululangana cyakabidi eci.”

72 Mèmè kwamba ne: “Kudiku mushindu wa kwikalaku nkàcinkaci wa njila pankaci peenu anyi, nwènù bânà beetu? Kudiku cintu kampanda cidi—cidi cifwanyine kwimana anyi?”

73 Ee, kabaakajinga kutubulaku mukana pa bwalu abu to, bwalu civwa cintu cya citapa bu keele. Nudi bamanye’s, kukaadi bidimu bitwe ku dikumi ne bitaanu, anyi makumi abidi, mushindu uvwabi’s, bwalu cisumbu cimwe cicivwa anu cifuma ku ditapuluka ku cikwabo, ne kuvwa dipangakanangana dyàbùngì dya bafiikilangane ne munda.

74 Ki mèmè ne: “Ee, bânà beetu, cìndi mèmè muswe kwenza ncyòcì eci. Ndi muswe ku-. . . Nzambi katu muntume bwa kubatiiza to, twamb’eku twamb’eku. Òtu muntume bwa kusambidila bânà Bende badi basaama.” Mèmè ne: “Pa nanku, mèmè nè—nènsambidilè bânà badi basaama, kadi nwènù bambi nwènzè dibatiiza dyenu nwènù nkààyeenù,” mèmè kwamba nanku.

75 Mèmè kwamba ne: “Mpindyewu ndi muswe kunukonka bwalu kampanda, anu bwa nwènù kufika ku dyumvwa.” Mèmè ne: “Mwaneetu Ness, aba. . . beena Yesu Nkaayende aba, udi witabuujaku ne badi ne Nyuma Mwîmpè padibo baakula mu myakulu ne benza cintu cimwecimwe cinudi nwenza mu Assemblées de Dieu eci apa anyi?”

Yèyè ne: “Cya bushuwa’s.”

76 Mèmè ne: “Mwaneetu Scism, udiku witabuuja ne beena Assemblées de Dieu badi ne Nyuma Mwîmpè padibo baakula mu myakulu ne benza cintu cimwecimwe cinwakenza panwakabatijjiibwa aci apu anyi?”

Yèyè ne: “Bushuwa’s, ndi ngiitabuuja nanku.”

77 Mèmè ne: “Mpindyewu, Bible mmwambe ne: ‘Nzambi udi ufila Nyuma Mwîmpè kudi aba badi baMutumikila.’ Mpindyewu, mbanganyi badi baMutumikile? Mbanganyi badi baMutumikile? Badi baMutumikile kunudi aku ki banganyi? Kadi pende Nzambi nyawu munupe bubidi bwenu Nyuma Mwîmpè.” Nwamonu anyi?

78 Mèmè ne: “Udi mufwanyine kwamba, wêwè Mwaneetu Scism, ne Mwaneetu Ness katu mupete Nyuma Mwîmpè anyi?”

Yèyè ne: “To.”

79 Mèmè ne: “Udi mufwanyine kwamba ne Mwaneetu Scism katu mupete Nyuma Mwîmpè anyi?”

80 “To.” Nwamonu anyi? Aci, bubidi bwabo baakiitabuuja ne umwe ne umwe wabo uvwa ne Nyuma Mwîmpè.

81 Kadi, nudi numona’s, kacylene cileeja anu ne ncya meeji to, bânà beetu. Kacylene cileeja ne ncya meeji nansha. Kadi ngâkumvwa, paanyima ndambu paa cyôci aci . . .

Nêngààlukilè ku bwalu bwanyi abu mu katanci emu.

82 Bânà beetu baa beena Finlande bàdì mwaba ewu aba, paanyima paa mèmè muumuke mu Finlande; mwômò amu mmùvwà Nzambi mutupe, cîntù mèmè mwele meeji ne, ndimwe dya ku masangisha etu a matambe bunene. Mwômò amu mmùvwà mwânà wa balume mukese mufwe, mubiishiibwe ku lufu, ne bintu byàbûngi. Mwamwa mu Stockholm, mu Suède, mèmè kutuutakeenamumu ne Lewi Pethrus wa mu ekeleeziya wa mu Philadelphie udi muntu munene wa Nzambi, ne ekeleeziya wa mu Philadelphie. Mwaneetu Gordon Lindsay, uvwa mpindyewu . . . mûndi ngeela meeji’s. Ncyèna ngeela meeji yèyè uci wa mwômò amu mpindyewu to, kadi ùvwa wa mu Assemblées de Dieu.

83 Kadi Assemblées de Dieu mbamwe baa ku banene badi bantuudiletuudile mfranga, mu buloba bujima. Ne beena Foursquare, bàvwà biikàle batuukakane ne Assemblées de Dieu, mbamwe baa ku banene badi bantuudiletuudile mfranga. Ba-Unitaires, mu buloba bujima, mbamwe baa ku banene badi bantuudiletuudile mfranga. Nwamonu anyi? Nenu ndi mwimanyine pa mwaba awu, nshiya anu nseke ya cilunji cikole ayi, ne pashiishe mwimanyine pa mwaba kampanda, bwa ne ncilu kusungula luseke lwa nî ng’eku anyi eku kwa dikokangana adi to. Too ne patwikale anu mwa kumona ne tudi bânà baa muntu, ne tudisangisha, nenku dîbà adi netu—netumone bônso bwalu bumwebumwe abu mu bwôbò, kutudi tuya batangile, kabingila ne kiipacila katudi tucyenzela.

84 Nenu udi—udi ne cya kukenketa kabingila ne kiipacila kaudi naaku, dyambedi. Dyambedi, anji jandùlà diswa dya Nzambi; ne pashiishe jandùlà kiipacila keebe; ne pashiishe

kenketa kabingila keebe bwa kumona ne kabingila keebe nkajaalame anyi. Pashiishe, bu mwakamba Yesu mu Maako 11.24 ne: “Wèwè mwambile mukuna ewu ne: ‘Tentemuka,’ kuyi wela mpatà mu mwoyi webe to.” Kadi paucidi anu ne mpatà mu mwoyi, ya ne ndiswa dya Nzambi anyi, anyi kabingila ne kiipacila keebe kòkò kabi, newutentemuke bishi? Kadi paudi mumanye ne kabingila keebe nkajaalame, ne ciikàle diswa dya Nzambi, ne kiipacila keebe nkajaalame, mukuna awu udi ne cya kutentemuka. Ki cidìku, cyanaana’s Nzambi mmwambe cintu cya mafi.

<sup>85</sup> Ki kabingila menemene kadi kenza ne, pândi nya ku cyambilu, mu maekeleeziya, muntu nansha umwe katu mwanji kungumvwaku nteela bintu abi mu cyambilu to, tulumbulumbu twine atu. Mémè ndi anu ntùshiya ku luseke. Nwamonu’s, aci nci tangile, ncinutangile nwênù balumyana. Nwamonu anyi? Mémè ndi mwaba ewu mbwa kunukwacisha bwa kupetela Kilisto misuuka, ku dipà dya kudi Nzambi, nudi numona’s. Nwamonu anyi? Kabyena ne cidibi bishintulula to. . . Nwênù dyènzèlaayi dibatiiza dyenu. Kadi pashiishe pakaadibi bikafika. . .

<sup>86</sup> Mu bushuwa bwa bwalu, mémè ewu batu bakaadi bantwe mènà ònsò. Batu bantwe mènà, ncyèna mumanye ne mbúngi kaayi to, mulongulongu kubangila ku dya ne—ne “mwànà wa Nzambi mwandamuke mubidi” kupweka too ne ku dya ne—ne “démon.” Ncyà bushuwa, byònsò. Kadi, ku luseke lwa byònsò ebi, ndi mwaneenu, mwena mwabo neenu wa Bukalenge bwa Nzambi; nkwata neenu bònsò mudimu, bwa Bukalenge. Ne aci ncyà bushuwa.

<sup>87</sup> Nenu mémè, piikalabi bikumbane, ne nwênù nwela meeji ne tudi ne dibà búngi bukumbane, ndi muswe kunwambila mushindu utwakakokangana pa bwalu abu. Mbifwanyine kwikala bikumbane anyi, Mwaneetu, Mwaneetu Ness ne bakwabo abu? Eyo. Kadi mbifwanyine kwikala ndambu cintu cifwanyine kunukwacishaku. Ncifwanyineku kunukwacisha bwa nwênù kuumvwa, mu mushindu kampanda.

<sup>88</sup> Ndi mufunde, mwaba ewu, bimwe bya ku bintu bîndi muvuluke ne bòbò bavwa babyùmùshe kuntwaku. Ki bòbò kunkonka, cimvwa ngiitabuuja pa bidi bitangila “busatu,” bwa ne mvwa ngiitabuuja ne “busatu” bwa Nzambi bütukù anyi?

<sup>89</sup> Mpindyewu, bânà beetu, patudi tukalenga bwalu ebu, ndi ne ditekemena dya ne, piikalà bwalu ebu bujike, netwikale bânà baa muntu anu bamwebamwe batutu kwònsò eku abu. Nwamonu anyi? Kadi mémè ndi ndyumvwa ne ndi nnulayabu, bwalu beena kwitabuuja beenu batu balwa mu masangisha aanyi, ne ncyènàku muswe kulekela nansha umwe wa kudibo, umuka uya museeswishii bwe to.



90 Kabidi misangu yònsò ntu nkaadi mwambilambile bantu batu bamfundila nkonko, yidi kayiyi pa bindi mémè nyiisha mu cyambilu. . .Nenku kàleelèkì wanyi nyêyè ewu, ne bakwabo. Muntu mungeele lukonko ne: “Udi wamba bishi bwa *cikampanda*, anyi udi wamba bishi bwa *cikansanga*?”

91 Mvwa ngamba ne: “Konka mpaasata webe, wamonu’s. Bwalu, piikalabi ne yêyè ngudi mukulombole too ne paukaadi apa, too ne muwavu kupeta Nyuma Mwîmpè, yêyè awu ngwatungunuka neebe, udi umona’s. Wêwè, wamonu’s, konka mpaasata webe.” Bwalu, tuntu twa tukese bu twôtò atu tutu tufila cibwejàkàjì, ki bwa cinyi ntu nseemena kule naatu, nwamonu’s.

92 Mpindyewu, batu bakaadi bangambambe ne ntu mu—mulwishi wa malongolodi. Kadi, kí mmwômò to. Ndi ngeela meeji ne malongolodi mmalenga be, kadi padi ndongolwelu wenu wa bulongolodi bwenu unyanguka, aci’s ki cîndi mémè mbengangana naaci. Nwamonu anyi? Nansha yêyè wa ba-Unitaires, anyi—anyi wa ba-Trinitaires, anyi ní ngwa bishi, ndongolwelu; mbwena kwamba ne panukaadi bakafike pa kaaba kaa ne, nwênù mpindyewu. . .nwamba ne: “Twêtù tudi beena Assemblées de Dieu.”

“Ee, badi dinsambu dya mùsèsèsù baba mbanganyi?”

93 “Kaa, abu’s mbânà beetu. Batu—batu bababiikila ne ba-Pentecôtistes Unis.”

“Ee, kadi baba naka mbanganyi?”

94 “Kaa, abu’s mbânà beetu baa beena Foursquare. Kaa, s’tudi bânà baa muntu baa dikema patudi apa. Tutu ne bwobumwe bunene, twêtù naabo.”

“Kaa, nutu nwitabuuja bônsò cintu cya cimwe anyi?”

“Kaa, eyowa’s, s’tutu twitabuuja.”

“Mpindyewu, ee, cidi cinuvwiye nunku ewu ncinyi?”

95 “Ee, *aba* bânà beetu badi babatiiza *nunku*. Kadi *aba* babatiiza *nunku*, cyâdi panshi bibengangane ne byetu twêtù. Ne *aba* badi babatiiza. . .”

96 Byenze bu mu Afrike wa ku Sud mwamwa, mwaneetu, s’tukaadi bamonemone bya nanku. Bakaadi bangeele nkonko. Cisumbu cibatiiza misangu yisatu, cyâdi panshi. Ne cikwabo cibatiiza misangu yisatu, cyâdi muulu. Kadi bamba. . .Mémè kwamba ne: “Kunudi bapete ciine aci nkwepi?”

97 Aba ne: “PaakafwaYe, Bible mmwambe ne Wakiinamija mutu panshi kumpala,” ki bôbò ne, “nanku bikengela twikale tubalaadika batwe cyâdi panshi.”

98 Ki mémè kwamba ne: “Ee,” nkonka cisumbu cikwabo aci, “ncinyi. . .Kadi nwênù?”

Bôbò ne: “Kacya bakaadiku bajiike muntu mutwe cyâdi panshi anyi?”

<sup>99</sup> Ee, kadi nudi bamanye mudi bwalu? Kukosolokabo e kwenza bisumbu bibidi, malongolodi abidi. Kaa, luse we, bâna beetu! Cidi dyabulu ujinga’s cidi anu ncyôci aci. Cidiye ujinga’s cidi anu ncyôci aci. Eyowa’s. Dyênzàayi. . .

<sup>100</sup> Mpindyewu, nwamonu’s, kî m’Mission de la Foi Apostolique to, anyi—anyi kî ng’Assemblées Pentecôtistes mene to, lûngà luseke. Kî ng’aci to. Mudi bantu bîmpè batambe mu bisumbu byônsò bibidi abi, anu mudibo mwaba ewu emu. Kadi, nudi numona’s, ndongolwelu wa cintu ngudi ne bwalu.

<sup>101</sup> Mbyenze bu Katolike, anu mûnkaadi mwambambe amu. Yêyè mwikale mwena Katolike, kadi mweyemene Kilisto bwa kupeta lupandu, s’mmusungidiibwe. Cya bushuwa, s’mmwômò. Yêyè mweyemene ekeleeziya, mmujimine. Ne yônsò wa kunudi nwênù bâna beetu beena Mpenta utu mumanye ne, patwikala tweyemena ekeleeziya wa Mpenta bwa kutusungilaye, “twêtù, munkaci mwa balume, kadi ki beena dikenga baa menemene,” ncyà bushuwa’s, bwalu tudi bajimine. Ncyà bushuwa.

<sup>102</sup> Kadi twêtù beeyemene Yesu Kilisto, bwa dîbà adi tudi basungidiibwe, “ku diitabuujà dyebe,” (aci, cinganyi?) mudimu mujikija. Kadi tuntu tukesetukese twa byenzedi etu, ne bya mênà a bwena ne bukwa, abi kabyena ne cîdibi bishintulula ciine cya nsongo to.

<sup>103</sup> Mpindyewu, ki mêmè kwambila Mwaneetu Scism, kwambila. . . ne Mwaneetu Ness ne: “Bwa kwandamuna ku lukonko lwenu,” mêmè ne, “mpindyewu, ncyêna ngangata luseke kampana bwa kutwa ku cyenu nwênù bâna beetu to. Ne ndi mumanye ne, panucidi anu ne makokyanganyi apu, nwênù bônsò nudi bapiile. Nwamonu anyi? Bwalu, ndi mufwanyine kujinga kwikala mupiile mu dilongesha dyanyi, kadi mubinge mu mwoyi wanyi, pamutu paa kwikala mubinge mu dilongesha dyanyi, kadi mwikala mupiile mu mwoyi wanyi.” Nwamonu anyi? Mêmè ne: “Twamb’eku twamb’eku, cidi ne bwalu s’ngiikadilu wa mwoyi webe.”

<sup>104</sup> Nenku mêmè nkaadi mucivwije cyenzedi, bwa kumanya bwalu ebu: ne, muntu wetu ewu, cidiye wenza nansha ciikàle cinyi, ne nansha yêyè ne dishiilangana dya bishi, ne nansha binganyi bidiye ungamba; piikalabi ne mu mwoyi wanyi, kabiya anu byenze bu dibanza dingeela to, kadi mu mwoyi wanyi mêmè nciyiku mwa kunanga muntu awu mu mushindu wûndi munange muntu mukwabo kana yônsò ewu to, dîbà adi ndi mmanya ne kudi cintu cipampalamuke munda emu, nwamonu’s. Aci ncyà bushuwa, bwalu, cidi—cidi. . . nansha byôbi ne yêyè awu. . .

<sup>105</sup> Mwaneetu wa balume mutekete kulwaye, abidi adi panshi aa, mwaneetu mutekete wa mu Église de Christ. Nenku, kaa, kwimanaye mwaba awu, kadi kwamba ne: “Mulumyana ewu

n'démon.” Nwamonu anyi? Yêyè ne: “Ûdi wàkula bwa Nyuma Mwîmpè.” Yêyè ne: “Cintu bu nanku kacituku to. Bôbò, ee, s'anu bapostolo dikumi ne babidi mbàakapetà Nyuma Mwîmpè. Ne—ne dyondopa dya kudi Nzambi's dyakafidiibwa anu kudi bapostolo dikumi ne babidi abu.” Kutungunukaye mwaba awu, tusunsa tutwe ku makumi asatu.

106 Ki mêmè ne: “Indila kakese, mwaneetu. Ngeela meeji ne bivwa bikengela wêwè kumpaku mpunga wa kwakwila Cyôci eci, wamonu's.” Mêmè ne: “Wambi ne nutu nwakula mwaba udi Bible mwakule, ne nupuwa mwaba udi Ye mupuwe.”

Ki yêyè ne: “Eyowa.”

107 Mêmè ne: “Mpindyewu, wambi ne kuvwa anu bapostolo dikumi ne babidi bàakapetà Nyuma Mwîmpè. Bible mmwambe ne: 'Kuvwa bantu lukama ne makumi abidi mu nzubu wa kuulu paakapwaka Nyuma Mwîmpè, ne bakaji ne bônso.' Nenku swaku ungambileku, udi wela meeji ne Pôlò kaakapeta Nyuma Mwîmpè anyi? Wa bwalu yêyè wakaMupeta ntanta mule paanyima paa ciine aci, wamonu's. Kabidi wambi ne: 'Dipà dya dyondopa adi dyakafidiibwa anu kudi bapostolo dikumi ne babidi.' Kadi Stefano paakapwekaye, paanyima paa matuku ndambu, kadi kayi umwe wa ku baa dikumi ne babidi abu to. Kavwa nansha muyiishi to. Ûvwa mulami, kadi wakapwaka mu Samaaleya ne wakiipata badémóns.” Ki mêmè kwamba ne: “Kaa, mwaneetu!” Kushaalaku cinyaanya mwab'ewu mene, eyowa, mwaba uvwa ukengela kushaala mupuwe.

108 Nenku paanyima paa bimane kujika: “Kadi,” mêmè ne: “ndi nkufwila luse bwa pawãmbiikidi mûndi démon, bwalu ndi mumanye ne kuvwa ne meeji a kwamba nanku to.”

109 Nenku pashiishe pààjikijìye, kulwaye kûndi. Kwambaye ne: “Kudi cintu cimwepele cîndi mwa kwamba. Wêwè udi ne Nyuma wa Kilisto.”

110 Mêmè kwamba ne: “Mpindyewu, mwaneetu, ndi nganyi, démon anyi Kilisto?” Nwamonu anyi? Nwamonu anyi?

111 Kadi ndi nnwambila, nwamonu's, bwalu muntu wetu ewu, ùvwa mumvwe ne mvwa mumunange; nansha byôbi ne, mmubenge bîndi mêmè ngamba, ne ubibenga wosha ne munu mwîkù kabidi wàmba ne mambavi bantu bitangile. Yêyè. . .

112 Mêmè ntu cilembi, ne ntu ne nyama ya cisuku, kacya anu bandela. Ne bantu bakaadi bambambe ne: “Mmunyi. . .” Musangu awu paakakengelabi ne nshipe ours awu, ne keele, nwamonu's. Bôbò ne: “Kwakamuumvwa bwôwà to?”

113 Mêmè ne: “To. Bu mêmè anu mudidinge mumuumvwe bwôwà, yêyè ki uvwa mwa kwikala munshipe, nwamonu's.”

114 Kadi, nwamonu's, kwèna mwa—kwèna mwa kuyenzaku mikaaka to. Yôyi mmimanye ne udi ne bwôwà bwayi, anyi kwèna naabu. Wêwè ne bwôwà bwa kabalu, kadi tangila umone

ciìkalà kabalú aku mwa kwenza, nekakudyatakaje. Nwamonu anyi? Nenku wêwè ne bwòwà. . . Kwèna mwa kumudingakaja to. Bikengela anu wikalè ne cintu bushuwa.

Ki mudibi nanku awu ne Sataana.

<sup>115</sup> Ki mudibi nanku awu munkaci mwa bantu. Bikengela unange bantu. Kwèna anu mwa kudingakaja to. Bikengela anu wikalè ne cintu cilelela, cyanana cyùdì necidileeje mwaba kampanda, wamonu's. Ncya bushuwa. Bikengela unange bantu anu cya bushuwa, ne bôbò biine bamanyè ne utu mubanange. Nwamonu's, kudi cintu kampanda pa bwalu abu.

<sup>116</sup> Ki muntu awu mpindyewu, kubiikilaye mukajaanyi, kwènji ndambu wa matuku, wamba ne: "Mwaneetu Branham udipu anyi?"

Yèyè ne: "To."

<sup>117</sup> Yèyè ne: "Ee, cintu cimwe cidi cikengela ngămbè. Mwawa mubengangane nende ku mēyi, mu teoloji, kadi ndi ngamba ne mmusadidi wa Kilisto."

<sup>118</sup> Ee, dîbà adi, nenku pashiishe kumpala kwa mêmè kuumuka, kumfundilaye mukanda, wamba ne: "Nëndwe muntwamu, paùdì anu walukila. Ndi njinga dibatiiza dya Nyuma Mwimpè dya bwena dyùdì wamba adi."

<sup>119</sup> Pa nanku, nudi numona's, anu mwaba wùdì wêwè mufwanyine kwikala ne. . . Bu ne mwawa mupete meeji a mushindu awu, a ngamba ne: "Mona's, wêwè's udi cintu cyanaana. Dingumba dyenu dya kalekale adi kî ndimpè to, ne—ne nwènù biine bônsò beena Église de Christ kanwenaku bîmpè to. Kanwenaku bîmpè to. Nudi—nudi badémóns." Nunku ncyênàku mupete muntu awu to. Kadi bu mêmè mwa kwikala mumwambile ne ndi mumunange, kadi nciyi ncyambilamu mu mwoyi wanyi to, yèyè's uvwa mwa kwikala mumanye ne kî mmwômò nansha. Ki cyônso cidiku ncyôci aci. Bikengela wikale wamba wambilamu bwalu abu mu mwoyi webe.

<sup>120</sup> Nenku mmatuku ândì mbànda mu cyambilu diloolo, mu dijingulula adi, nwamonu's. Ncyèna nkwelela meeji to. Ncyèna anu ndya kantu to, paanyima pa didya dya mundaamuunya; njila byakudya nsambila, nshaadila anu mu cibambalu. Bwalu, Yèyè ki utu mundaye ne Neàcyènzè. Nenku ki bwa cinyi ndi nya nciyi ne mpatà nansha ya kânà to, bwalu Yèyè mmulaye ne Neàcyènzè. Ki bwa cinyi, nwamonu's, wanyi. . . Ndi mumanye ne kabingila kaanyi nkaa (cinyi?), kiipacila kaanyi nkaa (cinyi?), kaa kutancisha kwa Bukalenge bwa Nzambi.

<sup>121</sup> Piikala muntu ulonda ewu njila, wawa njila, nî nku ekeleeziya kaayi kuyaayaye; bu mudiye anu ulwa kudi Kilisto, bwanyi mêmè aci kî mbwalu to. Ne cyôci aci ki cidi mu mwoyi wanyi. Nwamonu anyi? Ne nansha byôbì ne, bu twètù mwa kuya kashààla beena Église de Christ, abi bidi anu bîmpè.

Mbîmpè. Piikalaye. . . Nansha mukashaale mwena ekeleeziya kaayi, bwanyi mèmè aci kî mbwalu to. Kadi padibi anu ne ngaamanyi kufikisha musuuka wende kudi Kilisto, ki cintu cya mushinga ncyôci aci.

<sup>122</sup> Pa nanku mèmè kwamba ne: “Mwaneetu Ness, kabiya bwa kupangakanangana to. . .” Mpindyewu mèmè ndi muswe. . . Mbikumbane bwa kwenza mudimu ne *eci* anyi, mwaneetu? [Mwaneetu awu udi wamba ne: “Bushuwa.”—Muf.] Mèmè ne: “Ndi muswe kwamba kadi kuumvwija.” Kadi, mu *eci*, ndi mufwanyine kunwambila nwênù bânà beetu badi apa aba. Mpindyewu, kanuyi kabyamba mu masangisha enu to. Bu nwênù mwa kuswa, ne nwênù mwa kunganyishilaku, itabaayi ngiikale anu—anu—anu mwaneenu. Nudi numona anyi? Ne mèmè mwine, piikalabi—piikalabi ne ndi mu ntupakanyi, apu numfwileku luse. Kadi ndi njinga kunuumvwija, bu mudibi ne baa mu bisumbu byônsò bibidi abi mbasômbe mwaba ewu mu dinda emu, bônsò ba-Unitaires ne beena—beena Assemblées, kabidi, ne beena diitabuuja dya ba-Trinitaires.

<sup>123</sup> Mpindyewu ndi njinga kwamba dîyî edi. Ndi njinga kwamba ne ndi ngiitabuuja ne baa nseke yônsò yibidi ayi badi mu ntupakanyi, padibo anu bakokangana aba ne aba apu, bwalu tubingila twabo ntubi. Nenu padi anu tubingila twenu twikale tubi, kiipacila keenu nansha kiikâlè kaa bishi, kadi padi tubingila twenu bwa kiine kiipacila aku twikâlè tubi, dîbâ adi kabyakukumbanaku to. Neya bushuwa.

<sup>124</sup> Mpindyewu, bamwe bantu mbambe ne: “Mwaneetu Branham, udi mwena Yesu Nkaayende.” Ndi muswe kwamba ne aci nntupakanyi. Ncyêna mwena Yesu Nkaayende to.

<sup>125</sup> Muntu mukwabo udi wamba ne: “Mwaneetu Branham, wêwè utu Trinitaire anyi?” To, mukalenge. Ncitu Trinitaire to. Ndi mwena Kilisto. Nwamonu anyi? Mèmè—mèmè—mèmè ncyêna. . . Mwaku wa trinitaire kî mmuteediibweku nansha mu Bible to, mwaku “busatu.” Ne mèmè ncyêna ngiitabuuja ne kudi Nzambi yisatu miikale ewu mwende ewu mwende to.

<sup>126</sup> Mèmè ndi ngiitabuuja ne kudi Nzambi umwepele mu midimu yisatu: Taatù, Mwânà, Nyuma Mwîmpè. Ki bwa cinyi menemene twâkatûmiibwa ne mudimu wa kubatiiza mu Dînâ dya Taatù, Mwânà, Nyuma Mwîmpè. Ndi ngiitabuuja ne n’Nzambi awu mwikale wenza bu udi udipwekesha, upweka kwînshi.

<sup>127</sup> Mpindyewu, Nzambi, paakamwenekelaYe muntu musangu wa kumpala, Ûvwa mu mmwenekelu wa Dikunji dya Kapya. S’nudi nwtabuuja aci’s, kî mmwômò anyi? Yônsò. . . Mubadi kana yônsò wa Bible ewu mmumanye ne Dikunji dya Kapya divwâ mu cipeela divwâ Logos adi, divwa m’Mwanjelo wa Cipungidi, uvwa Kilisto.

<sup>128</sup> Bwalu, Yèyè wakamba. . . Ûvwa. . . Kacivwa. . . Ngeela meeji ne mmu Yone Munsantu 6, Yèyè mmwambe ne: “Kumpala kwa

Abraham kwikalaku,” wàmba bwa “NDI” awu. Yèyè uvwa “NDI” awu.

<sup>129</sup> Pa nanku, civwa n’Nzambi, wa cijila; nansha bu muntu mwa kulenga ku mukuna aku, ùvwa ne cya kushipiibwa, nwamonu’s. Eyo. Mpindyewu, Nzambi umwèumwè awu uvwa ukeba kukwata mudimu wa kuDipingaja mu cifukiibwa Cyende cyakafukaYe. Mpindyewu, Kavwa ne mushindu wa kulwa pèpì naabo to, bwalu bôbò bavwa babi, ne mashi a mbuji ne a mikooko kaàvwakù umusha mpekaatu to. Tudi bamanye aci. Avwa anu abwikila mpekaatu cyanaana.

<sup>130</sup> Mpindyewu, kadi pashiishe Nzambi umwèumwè uvwa Dikunji dya Kapyá awu, kulwaYe mubidi, mu Mwánà Wende, ne kusômbelaYè mu mubidi wakabiikilabo ne Mukalenge Yesu Kilisto. Bible mmwambe ne: “Mu Yèyè mmudi musômbèle kaabujima kaa Bunzambi mu mushindu wa mubidi.” Ne Yesu wakamba mu. . .Ee, mu Timote wa Kumpala 3.16: “Kakuyi dikokangana to, bwalu busokoka bwa difwana dya Nzambi mbunene.” Nenu bôbò abu pavwabo mwa kububiikila ne mbunene, mona’s, citudi twètù bafwanyine kwenza ncinyi, nwamonu anyi? “Bwalu busokoka bwa Nzambi mbunene, bwalu Nzambi wakamweneshiibwa mu mubidi, ne wakamweneka kudi banjelo, ne wakangaciibwa muulu mu Butumbi,” ne bikwabo. Mpindyewu, Yèyè wakamba kabidi mu Yone 14, wambila Tomase ne: “Paudi muMmone Mémè, udi mumone Taatù. Kadi mbwa cinyi udi wamba ne: “Tuleeje Taatù?”” Bible mmwambe, ne: “Nzambi uvwa munda mwa Kilisto, upungisha baa pa buloba ne Yèyè mwine.”

<sup>131</sup> Mpindyewu, Nzambi kèna mwa kwikala bantu basatu, Nzambi yisatu to. Nansha Yesu kèna mwa kwikala Yèyè Mwine Tatwèndè to, mu umwepele. Nwamonu anyi? Pa nanku, nudi numona’s, cidi cyenza ne byônsò bibidi bidi mu ntupakanyi mu dyumisha dya maalu.

<sup>132</sup> Mpindyewu, nenku mpindyewu bu nwènù mwa kumona, kakwena mwaba nansha umwe. . .Piikalabi ne tudi ne Nzambi yisatu, s’tudi bampanganu. Mpindyewu, tudi bamanye aci.

<sup>133</sup> Bu muvwa mwena Yuda awu mungambe musangu kampana, pâmvwà nyiikilangana nende, wamba ne: “Ngwèpì wa ku bôbò abu udi Nzambi wenu? Ngwèpì udi Nzambi wenu, n’Taatù anyi, m’Mwánà anyi, anyi n’Nyuma Mwîmpè? Wenu ki wepi?”

Ki mémè ne: “Mona’s, kakutu Nzambi yisatu to.”

<sup>134</sup> Yèyè ne: “Kwèna mwa kukosolola—kukosolola Nzambi mu bitupa bisatu kadi kuMupa mwena Yuda to.”

Mémè ne: “To, mukalenge.” Mémè kwamba. . .

<sup>135</sup> Paakondopiibwa John Rhyn bufofo, ku Fort Wayne kwaka, nudi bamanye; nenku laabi ewu wa mu Mishawa-. . . anyi wa

ku Fort . . . Benton Harbor. Yèyè ne: “Kanwena mwa kukosolola Nzambi mu bitupa bisatu kadi kuMupa mwena Yuda to.”

<sup>136</sup> Mêmè ne: “Ncya bushuwa. Ncyèna mêmè ncyenza to.”  
Mêmè ne: “Laabi, mbifwanyine kukukolela bwa kwitabuujja baprofeta anyi?”

Yèyè ne: “To.”

<sup>137</sup> Mêmè ne: “Mu Yeshaayi 9.6, ùvwa wàkula bwa nganyi ne: ‘Bătùlelèdi Mwànà, bătupèèshi Mwànà wa balume, nebaMubiikile ne Mubedyanganyi, Nzambi wa Bukole, Mukalenge wa Ditalala?’”

Yèyè ne: “Awu uvwa m’Maasiya.”

Mêmè ne: “Nenku, Laabi, mbulelà kaayi bwikalà pankaci paa Maasiya ne Nzambi?”

Yèyè ne: “Yèyè neikale Nzambi.”

<sup>138</sup> “Ki cîmvwà ndyambidila.” Nwamonu anyi? Mpindyewu, nudi numona’s, aci’s ncyà bushuwa menemene. Ki cidiYe. Nenku mêmè ne: “Ngambiläku mpindyewu mwaba uvwa Yesu mupangile bwa kuuja anu menemene civwa muprofeta mwambe ne Yèyè neènzè.” Ki kubangaye kwela mbila ne kuya eku ne eku. Mêmè ne: “Ku Cyôci aci, ki kudi John Rhyn’s ewu mmupetele lumònò lwende.” Nwamonu anyi?

Ki yèyè ne: “Kabyena mwa kwenzekaku to bwa Nzambi kwikalaye ne mwànà wa balume!”

<sup>139</sup> Mêmè ne: “Yehowah munene awu wakabwikila mukaji kampanda mundidimbi, muvwa muprofeta mwambe ne Yèyè neènzè, ne wàkafùka kabulu kaa Mashi. Ne ku kabulu kaa Mashi aku ki kudi mubidi wa Kilisto mufumine.

<sup>140</sup> “Tangila, mu Dipungila Dikulukulu, Laabi,” mêmè ne, “pavwa muntu uya kafila mulambu, ùvwa wàngata mwànà wa mukooko. Ùvwa mumanye ne mmutupe ku mikenji ya Nzambi, nenku ùvwa wàngata mwànà wa mukooko. Ùvwa ùtonda mpekaatu yende, nenku mwànà wa mukooko ewu uvwa ushipiibwa. Pacivwa . . . byanza byende biikàle pambidi paa mwànà wa mukooko awu; ditonda dyende dya ne yèyè nguvwa ne cya kufwa bwa mpekaatu wende, kadi mwànà wa mukooko awu uvwa wangata kaaba kende. Dìbà adi kabulu kaa mashi kavwa kataayika; kadi yèyè uvwa ukwata mwànà wa mukooko mukese awu ne cyanza cyende too ne pavwaye umvwa ne mwoyi wende wa mutekete awu wăpätuku munda mwa mwànà wa mukooko awu, ne wăshâadi muuminyine. Pashiishe mwakwidi, mu bushuwa bwa bwalu, uvwa ùkùpa mashi pa—pa kapyà, pa cyoshelu cya cilumbulwidi cya cyamu cya kabanda.”

<sup>141</sup> Pashiishe mêmè kwamba ne: “Muntu awu, dìbà adi, uvwa upatuka mu mwaba awu, ne dimanya dya ne mwànà wa mukooko awu uvwa mwangate kaaba kende yèyè, kadi ùvwa ùpätuka anu ne dijinga dimwedimwe divwaye naadi

pavwaye mumùbwele apu, nwamonu's, bwalu mashi awu kaàvwa mwa kuumusha mpekaatu to. Wamonu anyi? Kadi pashiishe, mu ebu bwalu: 'Mukuukwidi mukezudiibwe musangu umwe, kacyena kabidi ne civulukilu cya mpekaatu to.' Kwaka, kuvwa mulambu wa ufidiibwa ku cidimu ku cidimu. Kadi," mêmè ne, "mpindyewu kudi ewu musangu, 'mukuukwidi mukezudiibwe musangu umwe, kàcyèna kabidi ne civulukilu cya mpekaatu to.' Bwalu . . .

142 "Tangilaaku, Laabi. Mu mwengùngù mukunze awu, kaamwoyi kakese kàdi kàbangà mu kabulu kaa mashi aku, kàdi kàfùminà kudi mubidi wa bulume aku, kàdi kàbwela mu mubidi wa bukaji. Ne mukaji ki udi ufila diyi; kadi, cikuka cya nzoole cidi mwa kwela diyi, kadi piikalaci kaciyi cipetangane ne ntaala to, diyi adi kadyakutooyikaku to."

143 Ki mêmè kwamba ne: "Pashiishe Nzambi, mutambe bunene uvwa muuje bikondo byònsò ne cibwashibwashi cyònsò awu, kudipwekesha kadi kushaala kaacivuba kakese munda mwa muntu mukaji." Ki pashiishe mêmè kwamba ne: "Patudi twètù basungidiibwe leelu ewu. . . Yesu kavwa nî mmwena Yuda nî ngwa baa Bisamba bya bende nansha, bwalu diyi divwa dipatula anu musunya nkaayaawu. Mashi ki avwa ne Mwoyi. Pa nanku twètù—twètù tudi. . . Bible mmwambe ne: 'Tudi basungidiibwe ku Mashi a Nzambi.' Udi umona, Yèyè kavwa nî mmwena Yuda nî ngwa baa Bisamba bya bende to; Uvwa Nzambi. Ki bwa cinyi, patudi tulwa ku cyoshelu tutenteka byanza byetu, ku diitabuuja, pa mutu Wende Yèyè, ne tuumvwa dipandiibwa ne dikenga dya lufu adi ku Kalvariyo, ne tutonda mpekaatu yetu, twamba ne tudi bapiile, ne Yèyè mmufwe pa kaaba keetu!

144 "Musangu awu, udi umona's," mêmè ne, "mashi a mwànà wa mukooko awu kaàvwa mwa kwalukila pa eci, mashi àvwa. . . Kabulu kaa mashi kavwa kataayike, ne mwoyi ùvwa mulekelela awu, mu ditaayisha dya kabulu kaa mashi aka kaa mwànà wa mukooko awu, kawuvwa mwa kwalukila pa mukuukwidi to, bwalu ùvwa mwoyi wa nyama, ne kawuvwa mwa kukumbanangana ne mwoyi wa muntu to.

145 "Kadi ewu musangu, pàakataayishiibwà kabulu kaa Mashi aku, kacivwa muntu menemene to. Civwa m' Mwoyi wa Nzambi, wàkalekelediibwà. Nanku padi mukuukwidi utenteka byanza byende, ku diitabuuja, pambidi paa Mwànà wa Nzambi, ne utonda mpekaatu yende, kaciyi mwoyi wa mûngà muntu to, kadi Mwoyi wa Nzambi ki udi walukila mu muntu ewu, ùdì Mwoyi wa Cyendelele. Mwaku ewu *Zoe*, ngudibo bakudimune ne: 'Mwoyi mene wa Nzambi.' Ne Yèyè mmwambe ne Neatupeshe *Zoe*, Mwoyi wa Cyendelele, nenku mpindyewu tudi bânà baa balume ne baa bakaji baa Nzambi. Ki bwalu mbwòbù abu's."

146 Mêmè kwamba ne: "Mpindyewu ncinyi aci? N'Nzambi, wenza bu udi udipwekesha. Wakalwa, dyambedi; 'muntu nansha



umwe kayi mwa kuMulengaku to,' bwalu muntu uvwa mwenze mpekaatu. Pashiishe kupwekaYe mu mubidi, 'bwa kulabula mpekaatu. . .kwangata mpekaatu.' Udi umona's, Yêyè, cintu cimwepele civwa Nzambi mwa kwenza, bwa kwikala mwakane, nkucyenza mushindu awu."

147 Cileejilu, anji ambaayi tũng bu ne mvwa ne bukookeshi pa bateeleji aba mu dinda emu, bu muvwa Nzambi naabu pa bukwabantu, nenku mêmè kwamba ne: "Muntu wa kumpala watangila ku dikunji dyadya, ufwafwa," kadi Tommy Hicks kutangilaku? Mpindyewu, cileejilu, ndi ngangata Carl- . . . "Mwaneetu Carlson, wêwè fwaku pa kaaba kende." Aci kî ncifwanyine kwikala cyakane to. Ndi mufwanyine kwamba ne: "Leo, wêwè's ki kâleelèkî wanyi; fwaku pa kaaba kende." Aci kî ncifwanyine kwikala cyakane to. "Billy Paul, mwanaanyi wa balume, fwaku pa kaaba kende." Aci kî ncyakane to. Mushindu umwepele wa mêmè kwikala mwakane, ngwa mêmè mwine ngangata kaaba kende.

148 Nenku ke cyakenza Nzambi ncyôci aci. Yêyè, Nzambi, udi Nyuma. Nenku Yêyè wakafuka. . .Yêyè, Wâkashintulula mudimu Wende wa mu dinaya. Civwa ne cya kwikala bwalu bwa bupapulungana, kùdi bantu, pa kwela meeji ku Yehowah mwânà. Úvwa anu mwa kwikala mulwe, muntu mukulumpe mushindame, kadi Wakalwa mu cidiilu cya nyama, pamutu paa mushiki wa tûmvi twa nyama. Yehowah mwânà, ùdila bu mwânà wa mu diboko. Yehowah mwânà, ùnàya bu mwânà wa balume. Yehowah mwânà, ùpeeya mabaya, bu mwenji wa mabaya. Yehowah mwânà, mu bunsonga. Yehowah, mukudika pankaci paa dyulu ne buloba, mwikàle pampala Pende ne bimoto bya nta ne makodi a basalaayi bakwacike maala. Yehowah, mwikàle ufwila bânà Bende. Yehowah, ùpunga ne lufu, bwa kupikula; kayi muntu mukwabo to, kadi Nzambi Yêyè mwine! Nwamonu's, Nzambi, ki civwa mudimu Wende ncyôci aci. Bwa cinyi? Ûdi ùkèba kwalukila mu myoyi ya bantu.

149 Mpindyewu, katuvwa mwa kuMulenga to, *Kwaka. Apa*, twètù kuMubaabata ne byanza byetu. Mpindyewu cyakenzaYe ncinyi, ku dilambula dya mubidi awu adi? Wakalwa Yehowah *munda* mwetu. Tudi bitupa Byende. Mu Dituku dya Mpenta, Dikunji dya Kapyà dyakataayika Dyôdi diine, nenku ndimi ya Kapyà kusombayi pamutu pa muntu ne muntu, bileeja ne Nzambi uvwa uDipandulula munkaci mwa Ekeleeziya Wende.

150 Nenku, bânà beetu, bu twètù mwa kudisangaku, ne kubumbakaja Cyôci aci! Dîbà adi tudi bapete Yehowah mu kaabujima, patudi tudisanga. Kadi mmunyi mutudi mwa kucyenza, padi *ewu* wakula mu myakulu ne upeta dibatiiza, *ewu* pende; nenku pashiishe kulekela *elu* ludimi lwa Kapyà apa nunku, ne *elu* nunku? TuCiteekaayi pamwe.

<sup>151</sup> Nzambi, mu Dituku dya Mpenta, paakapwekaye, Bible mmwambe ne: “Ndimi ya Kapyà yàkasòmba pamutu paa muntu ne muntu wa kudibo.” Ki bôbò... “Ndimi, miikale mifwanangane ne Kapyà,” ndimi. Civwa n’Dikunji dya Kapyà adi diikàle diDipandulula ne diDyabulula, munkaci mwa bantu, bwa twètù kwikala bânà baa muntu. “Mu dituku adi nenumanye ne Mémè ndi munda mwa Taatù, Taatù munda Mwanyi; Mémè munda Mwanyi, ne nwênù munda Mwanyi.” Nenku, twètù, tudi umwe. Tudi umwe, katuyi batapuluke to.

<sup>152</sup> Mpindyewu, Yehowah Nzambi, kuulu *Èku*, kavwa mwa kulenga bukwabantu nansha, bwa mukenji Wende Yèyè mwine wa cijila awu; Yehowah Nzambi kushaalaye mpekaatu bwetu twètù, ki kufutaye mushinga; bwa Yehowah Nzambi umwèumwè awu kupetaye mushindu wa kulwa ne kusòmbela *munda* mwetu. Nzambi *kumutu* kwetu; Nzambi *neetu*; Nzambi *munda* mwetu. Kacyi Nzambi yisatu to; Nzambi umwepele! Balongeshi baa tulaasa tutumbuke badi bapaala mikupa, padibo bateeta bwa kuCyumvwa. Cidi—cidi ndibuulula. Bikengela bakubuulwileCi.

<sup>153</sup> Mpindyewu, mpindyewu, pakaadibi bikafika ku dibatiiza, mpindyewu, bantu bààbûngì... Mpindyewu, bikengela nwènzè cyôci aci, bânà beetu. Anyi, bidi anu bu mûngâäkambilà Mwaneetu Scism ne Mwaneetu Ness, ne panwikala... Di—dikokangana kujuukadi. Ne muntu kana yònsò, bààbûngì baa kunudi nwênù bamanyi baa mabâlà badi mwaba ewu aba nudi ne dikumbanyina kumpita mémè; kadi ndi mwenze dilonga dyàbûngì pa cyena bwalu eci. Kabidi ndi mubale *Baataatù Bàà Kumpàlà Kwà Nicée, Nsangilu Wa Nicée*, ne bafundi bònsò baa maalu malonda, ne bikwabo.

<sup>154</sup> Lukonko alu lwakajuuka mu Nsangilu wa Nicée. Bònsò nseke yibidi baakapangila bukole; pààkangatà ekeleeziya wa Katolike luseke lwa busatu muye ne kwa naka, ne beena luseke lukwabo kuya ku bumwe, bònsò nseke yibidi ayi bààkaya kwa naka. Cya bushuwa menemene, bwalu bantu mbavwa ne cintu kampanda cya dyenzamu.

<sup>155</sup> Bikengela nulekele Nzambi àcyènzè, kabiya bikengela bwa twètù kuteeta bwa kucyumvwa to. Twikalaaayi bânà baa muntu. Tuyaaayi anu kumpala biikàle tulekela Nzambi wenza cintu ciikalaYe mwa kwenza aci. PiikalaYe kayi mikalu ne mumanye bintu byònsò, ne wakadyanjila kumanyisha ndekeelu kacya ku cibangidilu, mmunyi mutudi twètù mwa kwenza cintu kampanda pa bwalu abu? Tungunukaayi anu nwenda nuya. Ki mushindu ngwòwò awu. Londaayi mu dikàsà, bu mûngâmbi makeelela diloolo, pamwe ne Yoshuwa wetu munene.

<sup>156</sup> Mpindyewu tangilaayi, piikalabi ne kudi Nzambi yisatu... Ndi muswe anu kunuleeja mudi ciine eci ciikàle cicimbè. Piikalaku Nzambi yisatu, nanku’s Yesu uvwa Yèyè mwine Tatw’Ènd... Yesu kavwaku mwa kwikala Yèyè mwine

Tatw'Ēndè to, mwikàle umwepele. Nenku, piikalaku basatu, Yèyè kaakalediibwa ku dilediibwa dya kudi virgo to. Mpindyewu mbanganyi. . . ? Ndi njinga kwamba ne *eci* ki Nzambi Taatù; ne *eci* ki Nzambi Mwânà; ne *eci* ki Nzambi Nyuma Mwîmpè.

<sup>157</sup> Mpindyewu, nwênù bânà beetu bashileshiilangane bàdi mwaba ewu aba, tangilaayi *eci* kakese bwa numone cîndi njinga kuleeja aci. Ndi ndomba bwa Nzambi anukwacisheku bwa nucimone. Mpindyewu, tangilaayi, nwênù bônso baa nseke yibidi nudi nwitabuujaja cintu cya mwomumwe, kadi dyabulu ngudi munubwelele kadi kunutapulwilapu. Ncintu anu cimwecimwe menemene, ne mêmè nênnùjaadikilèci, ku dikwacisha dya Nzambi, kabidi ne Bible wa Nzambi. Piikalaci kaciya Bible to, nanku kanùcitàbi to. Ncya bushuwa.

<sup>158</sup> Kadi mpindyewu tangilaayi. *Eci* ki (cinyi?) Nzambi Taatù; *eci* ki Nzambi Mwânà; *eci* ki Nzambi Nyuma Mwîmpè. Ee, mpindyewu, twânji twimanaayibi kakese mpindyewu, biikàle tuteeka basatu abu mwaba awu; Nzambi Taatù, Mwânà, ne Nyuma Mwîmpè.

<sup>159</sup> Kaa, mêmè—mêmè ncyakupetaku dîbà dya kucyenza to. Ndi. . . [Bânà beetu badi bamba ne: “Tungunuka! Tungunuka!”—Muf.] Kadi, monaayi, ee, nêndwijakajè nye lubilu ne mwanyi mwônso. Nwamfwilaayiku luse, bânà beetu, kadi kacyakacya ncituku—ncituku—ncituku mwanji kupeta paa kuyiikidilangana neenu to, nenku ndi—ndi muswe kwenza nenku.

<sup>160</sup> Nenku dîbà adi, tangilaayaaku; Nzambi Taatù, Mwânà, Nyuma Mwîmpè. Mpindyewu, Nganyi uvwa Tatwëndè wa Yesu Kilisto? Nzambi nguvwa Tatwëndè wa Yesu Kilisto. Twètù bônso tudi twitabuujaja nanku. Ncya bushuwa anyi? [Disangisha didi dyamba ne: “Amen.”—Muf.] Eyo.

<sup>161</sup> Mpindyewu, patudi twangata Maataayi 28.19, paakamba Yesu ne: “Ndaayaaku, nulongeshe baa matunga ônsò, nubàbàtiiza mu Dîna dya Taatù, Mwânà, Nyuma Mwîmpè,” paanyima paa matuku dikumi, Peetelo wakamba ne: “Nyingalalaayi, nubatiijiibwe mu Dîna dya Mukalenge Yesu Kilisto.” Kudi dibengangana dya buludiludi mwaba kampanda. Mpindyewu, katwikadi's. . . kudi. . .

<sup>162</sup> Muntu ne muntu wáfidi bujaajiki, ne bikwabo. Ndyôdi edi. Dyanyi diitabuujaja ndyôdi edi, ne ndi anu nnwadijiladi kumpala kwenu, nwênù bânà beetu. Ncitu ngamba cyôci *eci* mu byambilu to; awu ngwenu mudimu. Kadi ndi njinga kunuleeja cîndi mêmè mmona ku nseke yônso yibidi, bwa Nyuma Mwîmpè wanubuulwilaci, nwamonu's.

<sup>163</sup> Mpindyewu, Maataayi 28.19, ne piikalabi—piikalabi ne Maataayi 28.19 udi ubengangana ne Byenzi 2.38, dîbà adi's kudi dibengangana mu Bible, nenku Yèyè kèna nansha ne

mushinga wa bwena ùdi naawu mabeji adi Byôbi abi bifundapu abi to.

<sup>164</sup> Mpindyewu bu nwênù mwa kumona mu Maataayi nshapita wa 16, Yesu wakapa Peetelo dibuulula, kumupa kabidi ne nsapi.

<sup>165</sup> Mpindyewu, vulukaayi ne, Bible katu mubuulula ku teoloji wa màyelè a mushindu kampanda makwatakaja kudi bantu to. To. Ndibuulula.

<sup>166</sup> Civwa ndibuulula, anu ku cibangidilu kwaka. Bwa cinyi Abele wakalambula Nzambi mulambu mwîmpè mutambe wa Kaayina? “Cyakabuuludiibwa kudiye,” bwa ne kabivwa mbimuma bya pêches, ne bya pommes, ne bya oranges, ne bya pommes to. Pîikalà bimuma bya pommes mwa kufikisha bakaji ku dimanya ne badi butaka, s’bidi bikengela twètù kubapa cyakabidi bimuma bya pommes, mwaneetu. Kanwenaku peenu nwela meeji nanku anyi? Mpindyewu, aci, aci cidi cyumvwika bu cidi cinyangakaja cijila, kadi ncyêna ne meeji a kwamba nanku to. Kadi, kacivwa mbimuma bya pommes to. To, mukalenge. Mpindyewu, bu ne bivwa nanku, kadi: “Cyakabuuludiibwa kudi Abele,” ne yêyè uvwa mashi a tatwëndè. Ki kulambulaye mashi, bwalu civwa ndibuulula. Cintu mu kaabujima kaaci nciibakila pa cyôci aci.

<sup>167</sup> Mpindyewu tangilaayi, ki mulobi wa mishipa wa kale mwikàle mupangi nyêyè ewu, kayi mulonge nansha kalaasa kiine kakumbane . . . Bible mmwambe ne yêyè uvwa mupangi ne kayi mulonge kalaasa to. Kadi ùvwa mwimane mwaba awu, ki Yesu kwela lukonko ne: “Nudi nwamba ne Mêmè Mwânà wa muntu ndi nganyi?”

<sup>168</sup> Umwe kwambaye ne: “Mona’s, Udi—Udi Môs- . . .” Anyi ne: “Badi—badi bamba ne: ‘Udi Môsà.’”

“Bôbò abu, badi bamba ne Mêmè ndi nganyi?”

Umwe kwambaye ne: “Mona’s, Udi Yelemiya anyi baprofeta, ne *bikampanda*, *bikansanga*, anyi *bikankenga*.”

<sup>169</sup> Yêyè ne: “Lukonko kalwena nanku to. Ndi munukonke *nwênù*. Nwênù nudi nwamba ne Mêmè ndi nganyi?”

<sup>170</sup> Ki Peetelo kwanjiye kushaala mupuwe, kadi kwamba ne: “Wêwè udi Mwânà wa Nzambi.”

<sup>171</sup> Ki Yêyè kwamba ne: “Udi mubeneshiibwe, Simona, mwânà wa Yona.” Mpindyewu tangilaayi. “Kî mmusunya ne mashi bidi bikubuulwile eci to, kadi n’Taatu Wanyi udi mu Dyulu.” Nwamonu anyi?

<sup>172</sup> Mpindyewu tangilaayi, mpindyewu, ekeleeziya wa Katolike udi yêyè wamba ne Wâkiibakila Ekeleeziya pa Peetelo. Aci’s ncyà mafi.

<sup>173</sup> Ekeleeziya wa Mishònyì udi yêyè wamba ne: “WâkaMwibakila pa Yêyè mwine.” Kadi mpindyewu tangilaayi nujandule, numone ni bidi nanku.

174 WàkaMwibakila pa dibuulula dya nyuma dya ne Yêyè Nganyi, nwamonu's, bwalu Wákamba ne: "Udi mubeneshiibwe, Simona, mwânà wa Yona. Kî mmusunya ne mashi bidi bikubuulwile eci to. Ndi ngamba ne wêwè udi Simona; pa lubwebwe elu" (lubwebwe kaayi? dibuulula) "Nèngiibakilèpu Ekeleeziya Wanyi, ne biibi bya iferno kabyena mwa kuMutamba bukole to."

175 Pashiishe, pavwa Peetelo mwimane mwaba awu pavwa Maataayi 28 mwambiibwe apu, dya ukudimuka, paanyima paa matuku dikumi, mwikàle ne dibuulula adi, kubatiizanganaye mu Dinà dya "Mukalenge Yesu Kilisto." Wákacyènza bwa cinyi? Pèndè ne dibuulula dya kudi Nzambi; ne yêyè ki uvwa ne nsapi ya Bukalenge's, mwaneetu.

176 Mpindyewu ndi mufwanyine kunutapaku ku mwoyi kakese, luseke lumwe lwa kunudi, kadi anji imanaayi kakese. Kakwena mwaba nansha umwe mu Bible ukaadiku bantu babatiijiibwe mu Dinà dya "Taatu, Mwânà, Nyuma Mwimpè" to. Kakwenaku mwaba nansha umwe mu Mifundu to. Nenku piikalawumu, nuwutwale. Kabidi nwènù mwa kupeta mwaba kampanda nansha umwe mu maalu malonda mansantu, too ne ku dyanzeka dya ekeleeziya wa Katolike, ndi muswe nuwutwale. Kakwena mwaba nansha umwe to, mpindyewu, nenku aci ncilelela.

Kadi mpindyewu indila kakese, wêwè Unitaire, anu kakese menemene.

177 Mpindyewu, kakwena mwaba nansha umwe udi... Bu muntu mwa kundeejaku mwaba umpwepele wa mu Mifundu udibo benze awu mushingà mu Bible, wa "Taatu, Mwânà, Nyuma Mwimpè," udi mwenzejiibwe bwa kulwa kungambila mwaba ukaadiku muntu mubatiijiibwe mushindu awu.

178 Kadi bamwe baa kudibo badi bamba ne: "Ee, ndi muswe mêmè kwangata cyàkambà Yesu, kuumusha cyàkambà Peetelo." Piikalabi ne bivwa bibengangane, eci ne eci, citwenza ki cinyi? Piikalà byònsò abi kabiyi Nzambi to, citupa cya Bible cidi cya bushuwa mwaba wu ki cyèpi?

179 Bidi bikengela bwa byònsò binwangane ne bipetangane, kabidi biikàle anu dibuulula dya Nzambi. Bilongelu byetu kabyadyakudilongeshaku to. Ndibuulula, bwa nwikale ne cya kuCimona.

180 Pashiishe, piikalà bantu babidi abu bambe maalu abengangana, ewu ne ewu, dîbà adi m'Bible wa mushindu kaayi awu utudi tubala? Mmunyi mûngààmanyà ne Yone 14 ngwa cya bushuwa, anyi kî ngwa cya bushuwa? Mmunyi mûngààmanyà ne Yone 3 ngwa cya bushuwa, anyi kî ngwa cya bushuwa? Mmunyi, mmunyi, mmunyi mûngààmanyà? Nwamonu anyi?

181 Kadi mushindu umwepele wûndiku mwa kwikala ne diitabuuja kudi Nzambi, s'ngwa kumanya ne Bible awu mmulelela, ne kwitabuuja ne Yêyè mmulelela, ne kushaala anu

Nende. Nansha nciyi mMuumvwa to, ndi mMufikisha ku dyenza maalu, nansha bishi.

<sup>182</sup> Kadi pàkaadi bya dibengangana ebi bijuuka, dîbà adi ndi nya kumpala kwa Nzambi, bwa kujandula. Nenku Mwanjelo uwèumwè utu utwilangana naanyi mu masangisha, ne bufuku awu, n'Yèyè umwèumwè awu Utu mundongeshe Cyôci eci. Nwamonu anyi? Mpindyewu monaayi eci nî ncyôci eci, mushindu udi eci mpindyewu.

<sup>183</sup> Mpindyewu, Maataayi 28.19, twänjààyibi kutangila katanci kakese cyanaana mpindyewu. Nenku mpindyewu nêngàngatè Byenzedi 2.38 apa mene, mùdì Peetelo mwambe ne, “Mukalenge Yesu Kilisto” amu. Kadi Maataayi yèyè mmwambe ne: “Taatu, Mwânà, Nyuma Mwîmpè.”

<sup>184</sup> Mpindyewu teejeayaaku. Yèyè mmwambe ne: “Nubabatiize. . .” Kabiya “mu dîna dya Taatu, mu dîna dya Mwânà, mu dîna dya Nyuma Mwîmpè” to. Kaakambaku nanku to. Kakwena bya ne “dîna. . . mu dîna. . . mu dîna” to.

<sup>185</sup> Kaakambaku ne: “Nubabatiize mu *mênà* a Taatu, Mwânà, ne Nyuma Mwîmpè” to, bwalu aci kaciyena nansha cya meeji to.

<sup>186</sup> Wákamba ne: “Nubabatiize mu Dîna (D-î-n-à) dya Taatu, Mwânà, ne Nyuma Mwîmpè.” Ncya bushuwa anyi? “. . . dya Taatu, Mwânà, ne Nyuma Mwîmpè,” mutwangaji awu, “ne, ne, ne.”

<sup>187</sup> Kabiya *mênà* to. Kabiya “mu dîna dya Taatu, dîna dya Mwânà, dîna dya Nyuma Mwîmpè” to. Kabiya ne, “mu *mênà* a Taatu, Mwânà, ne Nyuma Mwîmpè” to. Kadi, “mu Dîna,” D-î-n-à, ku bumwe, “dya Taatu, Mwânà, ne Nyuma Mwîmpè.” Mpindyewu, ndîna kaayi dya kudiwu didi dya cya bushuwa didi dikengela kubatiiza mu dyôdi? N'Dîna dimwepele. Ndyèpi diine adi? “Taatu” ki dîna dya cya bushuwa, anyi “Mwânà” ki dîna dya cya bushuwa, anyi “Nyuma Mwîmpè” ki dîna dya cya bushuwa?

<sup>188</sup> Didi “Dîna,” mwaba kampanda. Ncya bushuwa anyi? [Disangisha didi dyamba ne: “Amen.”—Muf.] Ee, mpindyewu ndi muswe kunukonkaku cintu kampanda, dîbà adi. Piikalà “Dîna” adi, dîbà adi, piikalabi ne Yesu wakamba ne, “Nubabatiize mu Dîna dya Taatu, Mwânà, ne Nyuma. . .” Mbanganyi badi biitabuuja ne ki cyakamba Yesu? [“Amen.”] Ki Mufundu ngwôwô awu. M'Maataayi 28.19 awu: “Mu Dîna dya Taatu, Mwânà. . .”

<sup>189</sup> [Mwaneetu Branham udi umona ditanaja—Muf.] Kudi cintu kampanda citudi. . . To, kî ncyôci to, mvwa ngeela meeji. . . Mbîmpè, mukalenge. [Mwaneetu wa balume mukwabo udi wamba ne: “Mfwîlèku luse, Mwaneetu Branham?”] Eyo. [“Ndi muswe kukudimuna mukaba wa mèyi ewu, bwalu ncyèna muswe mpange kukwata aci to.”] Bîmpè. [Katupa kaa mukaba wa mèyi munda mutupa.] . . . ? . . .

<sup>190</sup> Mpindyewu, “mu Dîna dya Taatù, Mwânà, ne Nyuma Mwîmpè.” Mpindyewu teejeaayi, bânà beetu. Kakwena cintu paaci ne ndîna dya “Taatu” to, bwalu *Taatù* kî ndîna to. Mmwânzù. Kakwena cintu paaci ne ndîna dya “Mwânà” to, bwalu *Mwânà* mmwânzù. Kakwena cintu paaci ne ndîna dya “Nyuma Mwîmpè” to. Aci ncidiYe.

<sup>191</sup> Mvwa ngamba cyôci aci mu didya dya dinda dya bambi mu dinda kampanda, ki mukaji mukwabo... Mu cincyòmpanyòmpa, mu bushuwa bwa bwalu, bwa muntu pèndè mufwanyine kufila cimvundu, mu cintu bu nanku. Yèyè kwamba ne: “Imanabi kakese! Mfwilèku luse!” Yèyè ne: “Nyuma Mwîmpè’s ndîna.”

<sup>192</sup> Mêmè ne: “Aci ncidiYe. Mêmè ndi muntu, kadi dîna dyanyi kadyena ‘Muntu’ to.”

<sup>193</sup> N’Nyuma Mwîmpè. Aci kî ndîna to. Aci ncidiYe. N’dîna dya patupu, mu bushuwa bwa bwalu, kadi kî... Cidi—cidi... Kî ndîna diinyika to.

<sup>194</sup> Mpindyewu, bu Yèyè mwambe ne: “Nubabatiize mu Dîna dya Taatù, ne dya Mwânà, ne dya Nyuma Mwîmpè,” padibi ne nî n’Taatu, nî m’Mwânà, anyi nî n’Nyuma Mwîmpè kaciya dîna to, nenku n’Dîna kaayi? Tudi baswe kujandula.

<sup>195</sup> Mpindyewu, tudi mwa kubipeta byônsò mu mwaba umwe apa nunku, bu nwênù mwa kutangila anu cyanaana ne—ne—ne kupicishaku ndambu wa dîbà mpindyewu, anyi kulaminyinaku dîbà ndambu’s, ki cimvwa muswe kwamba. Mpindyewu monaayaaku Maataayi 28.19. Mpindyewu, ncyêna ngamba ne... .

<sup>196</sup> Nudi mwa, nudi bafwanyine kwikala bacyenzè, bamwe baa kunudi nwênù bânà beetu baa bakaji anyi baa balume. Udi mufwanyine kwikala mwangule mukanda, dîngà dituku, ne muwutangile pa cizubu cya paanyima, bambepu ne: “Jean ne Marie bàakasomba kashidi mu disanka paanyima.” Ee, Jean ne Marie mbanganyi? Mbanganyi... Jean ne Marie bàakasomba kashidi mu disanka paanyima abu mbanganyi? Kudi mushindu anu umwepele wûdiku mwa kufika ku dimanya ne Jean ne Marie mbanganyi; mbwena kwamba ne, piikalaci cintu cikukolele bwa kuumvwa, alukila cyanyima ubale mukanda awu. Ncya bushuwa anyi? Alukila ku ntwadijilu kadi uwubale too ne ku ndekeelu, nenku udi ukwambila ne Jean ne Marie mbantu kampanda.

<sup>197</sup> Ee, piikalà Yesu mwambe, Yesu Kilisto Mwânà wa Nzambi, mwine wâkamba ne: “Ndaayaaku, nulongeshe baa matunga ônsò, nubabatiize mu Dîna dya Taatù, Mwânà, ne Nyuma Mwîmpè,” pàdi Taatù, Mwânà, anyi *Nyuma Mwîmpè* kayi dîna to, pa nanku, piikalaci cintu cikole bwa kucyumvwa, s’bidi bikengela bwa twalukile ku ntwadijilu wa Mukanda.

198 Mpindyewu tubuululaayi mu nshapita 1 wa Maataayi, nenku netubangile mwaba awu, udi ufila dilondangana dya ndelanganyi, too ne padibi bikafika ku mvensa wa 18.

199 Mpindyewu tangilaayi, mpindyewu tangilaayi kakese. *Eci ki Taatù, ku dyabalume dyanyi eku; eci cidi pankaci eci ki Mwânà; ne eci ki Nyuma Mwîmpè. Mpindyewu, eci ki Tatwëndè wa Yesu Kilisto. Ncya bushuwa anyi? Nzambi ki Tatwëndè wa Yesu Kilisto. Twètù bônso tudi twitabuuja nanku anyi? [Disangisha didi dyamba ne: “Amen.”—Muf.] Bîmpè.*

200 Mpindyewu Maataayi 1.18 mmwambe ne:

*Mpindyewu dilediibwa dya Yesu Kilisto dyakenzeka mushindu ewu: Pavwa...mamwëndè Mariya mubangila kudi Yozefu, kumpala kwa yèyè...bôbô kushaalabo kaaba kamwe, wakanganyibwa ne difu dya... [Disangisha didi dyamba ne: “Nyuma Mwîmpè.”—Muf.]*

201 Paanyi’s mvwa ngeela meeji ne Nzambi ki uvwa Tatwëndè.

*Nenku yèyè nealele mwânà wa balume,...bôbô nebamwinyike dinà ne YESU:...*

*Ki Yozefu bayende, bu muvwaye muntu wa maalu malulame,...kayi muswe bwa kumunyangila luumu kumpala kwa bantu bônso, kadi kwelaye meeji a yèyè kumulekela mu musokoko.*

*Mu mushindu ewu, pacivwaye welangana meeji pa maalu aa, monaayi, mwanjelo wa Mukalenge e kumunwenekelaye mu ciloota, wamba ne: Yozefu, wèwè mwânà wa Davidi, kuciinyi bwa kwangata mukajeebe Mariya kwebe to: bwalu udiye mwimite munda mwende awu ngwa kudi... [Disangisha didi dyamba ne: “Nyuma Mwîmpè.”—Muf.]*

202 Paanyi’s mvwa ngeela meeji ne Nzambi ki uvwa Tatw’Ëndè. Mpindyewu, Ûdi ne baatatw’Ëndè babidi anyi, bânà beetu? [“To.”] Kêna mwa kwikala naabo babidi to. Yèyè naabo babidi, Ûvwa mwânà wa panshi, nenku nntendeleelu wa mushindu kaayi utudi nende mwaba awu? Bikengela nwitabe ne Nzambi Taatù ne Nyuma Mwîmpè badi Nyuma umwepele’s. Bushuwa, n’Yèyè. Bushuwa, Ûdi Nyuma umwepele. Mpindyewu, tukaadi benze aci, ne tukaadi bamane kucimona.

*Nenku yèyè nealele mwânà wa balume, ne bôbô nebamwinyike dinà ne YESU: bwalu yèyè ki wasungila bantu bende ku mpekaatu wabo.*

*...byônso ebi byakenzeka, bwa kumonabi mwa kuuja...*

203 Cîndi nteela eci m’Mufundu. Nwênù bambi nudi bamanye, pândi ngenda nya apu.



...*bwa kumonabi mwa kuuja*...cyakamba  
muprofeta, ku dîyî dya Mukalenge, *wamba ne*:

...*virgo* neimite difu, *ne...nealele mwânà, ne  
nebamwinyike dînà ne Emanuwele, cidi ciswa kwamba*  
bilondeshile dyumvwija ne, . . . [Disangisha didi dyamba  
ne: “*Nzambi neetu.*”—Muf.]

204 “Nzambi neetu!” Ncya bushuwa anyi?

205 Dîbà adi Dînà dya Taatù, Mwânà, ne Nyuma Mwîmpè  
nganyi? [Mwaneetu wa balume mukwabo udi wamba ne: “Yesu  
Kilisto.”—Muf.] Ee, cya bushuwa’s. S’ki bwa cinyi Peetelo  
wakababatiiza mu Dînà dya “Yesu Kilisto.”

206 Kadi, kabyena bintacisha to, pawikala mubatiijiibwe mu  
dînà dya Rose wa Shalona, Mbata wa mu Cibanda, Mutooto  
wa mu Dinda, ayi mmyânzù, yôyî paayi. Piikalà mwoyi  
webe mujaalame kumpala kwa Nzambi, Yèyè ngudi mumanye  
mwoyi webe.

207 Kadi mpindyewu, mpindyewu, mêmè kujikula cyôci  
aci. Mpindyewu, mpindyewu mêmè kwamba...Mpindyewu  
Mwaneetu Scism kwambaye ne: “Mpindyewu!” Mu bushuwa  
bwa bwalu, cya bushuwa, aci cyakamweneka bu cya ba-  
Unitaires, nenku yèyè umba utwa cyôci aci nyama ku mikolo.

208 Mpindyewu mêmè kwamba ne: “Mpindyewu mwaba ewu ndi  
muswe kukwambilaku cintu kampanda mpindyewu.” Nwamonu  
anyi? Mêmè kwamba ne: “Mpindyewu ndi muswe kukujaadikila  
ne, bantu aba bônso babidi, mbambe cintu cya mwomumwe.”

209 Mpindyewu, Maataayi mmwambe ne: “Mu Dînà dya  
Taatu.” Ncya bushuwa anyi? [Disangisha didi dyamba ne:  
“Amen.”—Muf.] Eyo. Kadi Peetelo yèyè mmwambe ne: “Mu  
Dînà dya Mukalenge.” Maataayi 28.19 mmwambe ne: “Mu Dînà  
dya Taatu,” kadi Byenzedi 2.38 mmwambe ne: “Mu Dînà dya  
Mukalenge.” Davidi wakamba ne: “MUKALENGE mmwambile  
Mukalenge wanyi.” Ûvwa Nganyi Awu? Taatu ne Mukalenge  
n’Dînà dimwe. Davidi wakamba ne: “MUKALENGE mmwambile  
Mukalenge wanyi ne: ‘Sòmba Wèwè ku dyabalume Dyanyi.’”  
Nwamonu’s: “Mu Dînà dya Taatu; mu Dînà dya Mukalenge.”

210 Ne Maataayi mmwambe ne: “Mu Dînà dya Mwânà,” kadi  
Peetelo kwamba ne: “Mu Dînà dya Yesu.” Mwânà nganyi? Yesu.

211 “Mu Dînà dya Nyuma Mwîmpè,” m’Maataayi awu; kadi  
Peetelo mmwambe yèyè ne: “Mu Dînà dya Christ,” Logos.

212 *Taatù, Mwânà, Nyuma Mwîmpè*: “Mukalenge Yesu Kilisto.”  
Mona’s, mbipwangane bipange ne mwa kupwangana. Nwamonu  
anyi?

213 Mwaneetu Scism kungambilaye, anyi, Mwaneetu Scism,  
mwaneetu wa ba-Unitaires awu, kwambaye ne: “Mwaneetu  
Branham, aci ncya bushuwa, kadi,” yèyè ne, “aci’s ng’eci.”

214 Mêmè ne: “Nanku, eci ng’*aci*.” Ncya bushuwa. Nwamonu anyi? Mêmè ne: “Piikalabi ne aci ng’*eci*, eci ng’*aci*. Kadi apu cinudi nukokelangana ki cinganyi?”

215 Mêmè ne: “Itabaayiku nnupe mubelu, bânà beetu. Bu mêmè mwa kubatiiza muntu, mona cidi . . .”

216 Mêmè kwamba ne: “Mpindyewu, ki Docteur Ness nyêyè ewu.” Nenku nudi . . . muntu kampanda wâmbi, katanci aka, nwênù bânà beetu, ne nutu bamanye Docteur Ness.

217 Ee, nêngâmbè, mwaba ewu, Mwaneetu Hicks ewu, udi ne . . . Ngeela meeji ne udi ne Dipolome dya Docteur. Ncya bushuwa anyi? Eyo.

218 Mpindyewu mêmè kwamba ne: “Piikalà Docteur Ness, udi musômbe apa ewu . . .” Mpindyewu mêmè kwamba ne: “Bu ne mvwa muswe . . .” Mpindyewu, pângââyà ne muntu ku mâyi, bwa kumubatiiza, ndi njingulula cyôci aci anu mudiye pende mucijingulule emu, mêmè kwamba ne: “Ayi yivwa mmyânzù yivwa yitangila Dîna Dyende.”

219 Mêmè kwamba ne: “Mpindyewu, bânà beetu baa beena Assemblée badi bakwata mudimu ne myânzù, kadi bânà beetu baa ba-Unitaires badi bakwata mudimu ne Dîna.” Mêmè ne: “Mpindyewu ndi muswe kunujaadikila ne, nwênù bônso babidi nudi mu ntupakanyi, kadi mêmè ndi mu bulelela.” Nudi bamanye mûtubi bikengela bwa ku- . . . Paùdi ne bantu biikàle ne ngaakwilu wa dyelaku tuubilele ku musangu ne ku musangu, bwa kwikala kutuuyishaku cilunji ndambu. Ki mêmè kwamba ne: “Ndi muswe kunujaadikila ne nwênù bônso babidi nudi mu ntupakanyi, kadi mêmè ndi mu bulelela.”

220 Mêmè ne: “Mpindyewu, anji ambaayi tũng bu ne mvwa musweku kutwa Mwaneetu Ness mushinga, s’ndi mufwanyine kwamba . . .”

221 Anyi, anyi Mwaneetu Hicks ewu, nwamonu’s. Ndi mufwanyine kwamba ne: “Hicks!” Mpindyewu, aci nanku ncifwanyine kuumvwika cîmpè anyi? To. Ee, kadi ambaayi tũng bu mêmè mwa kwamba ne: “Docteur! Ê, Doc! Kadi bishi’s?” Mpindyewu, aci’s cidi cyumvwika cya dipanga dya kaneemu, kî mmwômò anyi?

222 “Panudi,” mêmè ne, “ki mushindu unudi nwênù beena Assemblées nwenza ngwôwò awu, nwamonu’s. Panudi nwênù bânà beetu baa beena Assemblée nwamba ne: ‘Mu Dîna dya Taatù, ne dya Mwânà, Nyuma Mwîmpè’ apu, nudi nwamba anu ne, ‘mu dîna dya révérend, docteur.’”

223 Ki mêmè kwamba ne: “Pashiishe, nwênù bânà beetu baa ba-Unitaires peenu, panudi nubatiiza, nudi nwamba ne: ‘Yesu!’” Kabatu bakwata mudimu ne . . .

224 Bòbò, beena Yesu Nkaayende, badi bakwata mudimu anu ne dîna dya “Yesu” nkaayaadi. S’kudi ba-Yesu bûngi cyanaana. Kadi, M’Mukalenge Yesu Kilisto, nudi numona’s. Badiku bûngi cyanaana . . . Kubatiiza mu dîna dya “Yesu,” ncyá bushuwa ne ncyêna ngiitaba aci to; kakwena Mufundu nansha umwe to. Angataayi mfundilu wa ku muji, numone ní kacýena “Mukalenge Yesu Kilisto.” Cya bushuwa, Yêyê m’Mukalenge Yesu Kilisto. Kudi ba-Yesu bûngi cyanaana, cya bushuwa. Kadi *Kilisto* awu ki “Mulaaba” awu.

225 Mêmè kwamba ne: “Mpindyewu, bu byôbi ne mvwa mwa kwambila Mwaneetu Ness cintu cimwecimwe aci. Mvwa mufwanyine kwamba, mbifwanyine kuumvwika bîmpè bu mêmè mwa kwamba ne: ‘Ê, Ness!’ anyi?” Mêmè ne: “Mushindu awu ki unudi nwênù ba-Unitaires bafwanyine kucyamba’s. Nwamonu anyi? Adi kí ndipanga dya kaneemu kudi muntu bu yêyê awu udi mulonge tulaasa, mupete ne Dipolome dya Docteur anyi? Piikalaye mulonge mufwileku bwa ciine aci, s’bidi bikengela bîikalèku bamutwa mwânzù awu.”

226 Ki mêmè kwamba ne: “Nenku bu mêmè mwa kwamba ne: ‘Ê, Doc!’” Mêmè ne: “Aci kí ncifwanyineku kuumvwika cya ciipanshi, bwa mwambi ubiikila mukwende mushindu awu anyi?” Anyi, mêmè kwamba ne: “Anu mushindu awu ki unutu nwênù nucyenza’s, anu luseke ludi lutangila mwânzù.”

227 Kadi mêmè kwamba ne: “Pândi nya ne muntu ku mâyi, ndi nseemena kudiye mmwela nkonko, nyiikilangana nende, mmanyá dîna dyende ne cyônsò cidiye, ne diitabuuja dyende.

228 “Pashiishe ndi nsambila, ngamba ne: ‘Mpindyewu, Taatù, bu Mûdi mututume ne mudimu wa “kuya pa buloba bujima ne kuvwija baa matunga ônsò bayiidi, . . .”’” Nwênù bânà beetu nutu bamanye ne aci ki cya ku muji, nwamonu’s. ““ . . . kuvwija baa matunga ônsò bayiidi, kubabatiiza mu Dîna dya Taatù, ne dya Mwânà, ne dya Nyuma Mwîmpè; kubalongesha bwa kwikalabo balonda bintu byônsò byûdi Wêwè . . . bintu byônsò byûdi Wêwè mutulongeshe.””

229 “Pa nanku awu nyewu ngâmbi ne: ‘Mwimanyine pa dijikula dyebe dya diitabuuja; mwimanyine pa ditonda dyebe dya mpekaatu yebe, ne diitabuuja dyebe mu Mwânà wa Nzambi, ndi nkubatiiza, mwaneetu wanyi munanga, mu Dîna dya Mukalenge Yesu Kilisto.”

230 Mêmè kwamba ne: “Mushindu awu ki wüntù mêmè mbatiiza. Ndi ngiitaba ne myânzù Yende, ne civwaYe, ne yônsò ya Taatù, Mwânà, ne Nyuma Mwîmpè ayi. Ne civwa Yesu mwambidile ciine aci, civwa . . .”

231 Mpindyewu tangilaayi. Piikalabi—piikalabi kabiyi nanku to, nudi ne mêyi abengangana mu Mifundu yenu; nudi bapete mêyi abengangana. Kadi cinwikala mwa kwenza ncinyi piikalà . . . Kadi bu mwaneetu Bouddiste ewu mwa kukatamuka anu panshi

mwaba ewu kwamba ne: “Kadi bishi bwa *eci*?” Cidibo bambe ncinyi padibo bangambile. . .

<sup>232</sup> Kuntu kwaka, pavwa mwaneetu wa ba-Indiens ewu mwele Morris Reidhead kadyombo, mumwambile, ne: “Kadi bishi bwa Maako 16?” S’byakamukengela kwalukilaye cyanyima pa bwalu abu.

<sup>233</sup> Kabyena bikengela wêwê kwalukila cyanyima pa cintu nansha cimwe to. Aci n’Diyi dya Nzambi. Shaala naaDi. Sambila anu patupu. Peta dibuulula. Dyônsô didi dyenda anu mushindu umweumwe awu.

<sup>234</sup> Nudi numona’s, bônsô babidi badi bamba anu cintu aci, mpindyewu; kacyi myânzû to; kabiyi bya ciipanshi to. Mêmè kwamba ne: “Mpindyewu. . .”

<sup>235</sup> Mêmè mvwa mwambe mujikule civwàYe. Ûvwa Taatû; kayi Nzambi mukwabo to. Ûvwa Mwânà; kayi Nzambi mukwabo to. Nzambi umwëumwè awu! Nwênû. . . Mmidimu yisatu. Nzambi mu cipungu cya bu-Taatû, panwikala baswe kuciinyika nanku, cya bu-Taatû; bu-Mwânà; ne cidi n’Nzambi umwëumwè awu munda mwetu mpindyewu: “Mêmè nêngiikalè neenu.” “Mêmè” awu, mupinganyi muleeji muntu: “Mêmè nêngiikalè neenu.” Pa nanku, nudi numona’s, mmidimu yisatu, kî n’Nzambi yisatu to.

Mpindyewu, mwaneetu, piikalabi ne bayiidi kabavwa bakwateku naayi mudimu to, too ne paanyima apu. . .

<sup>236</sup> Ncyêna ngamba kantu nansha kamwe bwa kucilwisha to. Cidi anu cîmpè. Ndi nnwambila ne, bu muntu mwa kupatuka mwaba ewu, mubatiijiibwe mu dîna dya “Rose wa Shalona, Mbata wa mu Cibanda, ne Mutooto wa mu Dinda,” kadi mwikàle mwithabuje Yesu Kilisto bu Musungidi wende, ndi mufwanyine kwamba ne: “Nzambi akubeneshe, mwaneetu! Lwâku tuyè!” Nwamonu anyi? Neya bushuwa. Bwalu, piikalà mwoyi webe kawuyi mujaalame to, kwêna mu bulelela to, twamb’eku twamb’eku. Cya bushuwa menemene. Nenku bikengela mwoyi webe—webe wikale mujaalame.

<sup>237</sup> Ki mêmè kwamba ne: “Mpindyewu tangilaayi. Mpindyewu, bu mêmè mwa kujinga kwela Mwaneetu Ness ewu mwoyi, ndi mufwanyine kwamba ne ‘Révérend Docteur Ness.’ Aci ncyá bushuwa. Yêyè mmwambi. Bivwa bikengela bwa bôbô kumutangula bu wa kuneemekiibwa. Mmulonge tulaasa, kabidi mulonge bikole. Ûdi ne Dipolome dya Docteur, nanku bivwa bikengela kumubiikila ne ‘docteur.’ Ki mwânzû wende, nwamonu’s. Kadi dîna dyende didi ‘Ness,’ nansha nanku. Mpindyewu, ncyêna mufwanyine kwamba ne: “Ê, Ness! Ê, Doc!’ to. To, aci kî ncifwanyine kwikala cîmpè to. Nêngâmbè ne: ‘Révérend Docteur Ness.’

<sup>238</sup> “Nwamonu’s, ki mûndi mbiikila, nwamonu’s, cidiYe aci; byônsô abi Taatû, Mwânà, ne Nyuma Mwîmpè, ‘Mukalenge Yesu Kilisto.’” Nwamonu anyi?

239 Ki mêmè kwamba ne: “Bu mêmè mwa kubatiiza muntu mu ekeleeziya yenu yònsò ayi, mushindu awu ki wùngààmubàtiizà.” Mêmè ne: “Udi mufwanyine kumwakidila anyi, Mwaneetu Ness?”

240 Yèyè ne: “Cya bushuwa’s. S’nyawu mubatijiibwe mu Dîna dya Taatù, Mwànà, ne Nyuma Mwîmpè.”

Mêmè ne: “Udi mufwanyine kumwakidila anyi, Mwaneetu Scism?”

Yèyè ne: “Cya bushuwa, s’nyawu mubatijiibwe mu Dîna dya Yesu.”

241 Mêmè ne: “Kadi ncilumbu kaayi kunudi nwênù, bânà beetu? Bwa cinyi kanuyiku nwitaba aci, bwa kuupula bimanu ebi mudi mùsanganyibwà bantu badi bakwate ne bya luse aba . . . ? Ba-Unitaires mbaswe nanku, cya bushuwa, masangisha, mbaswe kukuukwila pamwe ne beena Assemblées. Ne beena Assemblées paabo, masangisha, mbaswe kukuukwila pamwe ne ba-Unitaires. Ne bânà beetu badi mushindu awu. Badi mushindu awu. Kadi pacidi anu dyabulu mwa kubafikisha ku dilwangana mvita . . .”

242 Mpindyewu nudi numona cîndi njinga kwamba aci anyi, bânà beetu? Ndi nya mutangile ku cintu cimwepele aci, Yesu Kilisto, ne disangisha pamwe dya Mubidi wa Yesu Kilisto. Ki kiipacila kaanyi nkôkò aku.

243 Mpindyewu, ncyêna ngamba cintu pa ne: “Ê, wêwè kwêna mubatijiibwe mu Dîna dya Yesu; uyààya mu iferno” to. Mpindyewu, aci ndukutukutu.

244 Ndi nnwambila cyàkenzekà dîngà dituku. Mwawa mupye ku Texas kwaka. Kumpala kwa kuumuka . . . Ne bânà—bânà beetu aba mbantemu baa bwalu ebu. Ekeleeziya wa ba-Unitaires, ekeleeziya makumi mwandamutekete ne yibidi, yivwa mituule mfranga yayi bwa kwenzeja disangisha dyanyi. Ki mêmè kuteeka Mwaneetu Petty, mwaneetu wa mu Assemblée de Dieu, pa cibumba cya ku cyambilu diloolo adi. Mpindyewu, nudi bamanye aci ne ncyà bushuwa. Yèyè awu mmwaneetu wa mushinga mukole, Mwaneetu Petty awu, piikalà muntu wa kunudi mumumanye, ngwa mu Beaumont, mu Texas. Ûtu umwe wa ku bantu baa maalu matambe bwîmpè bânkaadiku paanyi mutwilangane naabo. Mukajende mmwena Katolike mukudimune mucima, mukaji munsantu wa bushuwa. Yèyè mmulume wa Nzambi wa cya bushuwa.

245 Ngambilaayi muntu wa maalu mîmpè kutamba Roy Wead, wa beena Assemblées de Dieu awu. Teelaayiku umwe wa ku bantu aba, tangilaayi apa, bânà beetu bônso bândi mumanye baa mu nyungulukilu emu aba. Mwaneetu wa balume ewu wa mu ekeleeziya wa Philadelphie emu, ne balume baa mu Assemblées de Dieu, mbantu kaayi badi baa maalu mîmpè kubatamba bôbô? Nteelelaayiku mwaba. Ngambilaayi muntu wa maalu

mîmpè kutamba Jack Moore? Ngambilaayi tûng. Yêyè udi cidibo babiikila ne. . . S'mbaa ku bôbô abu. Yêyè katu muumishi wa maalu to. Neupete buumishi baa maalu ku nseke yônsò yibidi; nenku kwôkò aku ki kudi bantu bafunkuna minu, ne ki kwôkù aku kudi dyabulu ufunkuna munu.

<sup>246</sup> Kadi bwônsò bwabo mbalume baa Nzambi. Nzambi mmubape Nyuma Mwîmpè. Bu kakuyi bwa ngâsà wa Nzambi, nunku twétù bônsò aba's tudi babutuuke, ne makokyanganyi ne bikwabo bitudi naabi ebi. Aci's ncyà bushuwa menemene. Kadi ngâsà wa Nzambi ngudi utuswikakaja pamwe ewu. Kabyena bikemesha to patudi mwa kwimba ne: "Mwonji udi uswikakaja myoyi yetu mu dinanga dya bwena Kilisto ubeneshiibwe." Ki cidi citukengela ncyôci aci, díbà adi.

<sup>247</sup> Kadi nudi bamanye mudi bwalu anyi? Mfumu wa midimu Wa bôbô bônsò wa kumutu kwa eke—ekeleeziya, kumbiikilaye, wamba ne: "Udi mumanye cyûdi mwenze diloolo dya makeelela anyi?" Diloolo dyanyi diibîdi muntwamu.

Mêmè kwamba ne: "Ncinganyi?" Mêmè ne: "S'ndi mwenze disangisha dilenga dya dikema."

Yêyè ne: "Wêwè's uvwa muteeke muntu mu cyambilu cyebe mwikàle ngènzàmpèkààtù."

Mêmè ne: "Ncivwa mumanye aci to." Mpenyi pàvwà. . .

Yêyè ne: "Mukalenge Petty awu."

<sup>248</sup> "Kaa," mêmè ne, "ngènzàmpèkààtù? Cinyi?" Mêmè ne: "Mwaneetu, s'mmuyiishi wa mu Assemblée de Dieu."

<sup>249</sup> Yêyè ne: "Eyo, kadi's uciidi anu ngènzàmpèkààtù, bwalu katu mubatiijiiibwe mudibi bikengediibwa to."

<sup>250</sup> Ki mêmè ne: "Mwaneetu, ndi nkulomba ungambileku ne mbwa cinyi." Mêmè ne: "S'mmupete Nyuma Mwîmpè."

<sup>251</sup> Yêyè ne: "Mwaneetu Branham, Peetelo wakamba cinyi? 'Nyingalalaayi, nubatiijiiibwe mu Dîna dya Yesu Kilisto bwa dilekelediibwa dya mpekaatu yenu.' Ki bwa cinyi mpekaatu yebe kayena mwa kulekelediibwa to paudi kuyi mubatiijiiibwe mu Dîna dya Yesu."

Mêmè ne: "Ki ndongamu nyêyè awu anyi, mwaneetu wanyi?"

Yêyè ne: "Ki ndongamu nyêyè awu."

<sup>252</sup> Mêmè ne: "Nanku's Nzambi uvwa munyangakaje ndongamu Wende, mu Byenzedi 10.49, bwalu: 'Pacivwa anu Peetelo wamba mêyi aa, Nyuma Mwîmpè wakapwekela aba bavwa bateeleja Dîyi,' wamonu's, kadi paabo kabavwaku banji kubatiijiiibwa to, nansha kakese. Nanku, Nzambi wakafila Nyuma Mwîmpè kudi bantu bavwa kabayi nansha bakudimune mucima anyi?" Mêmè kwamba ne: "Udi wimanyinaku kabidi penyi mpindyewu?"

253 Yêyè ne: “Udi mumanye citwikala mwa kwenza anyi?” Yêyè ne: “Netuzole kaacijengu kakese, tuzola tukushiya wêwè awu pambelu paa kaacijengu keetu aku.”

254 “Dìbà adi,” mûngààkambà, “mêmè paanyi nênzolè kakwabo, nzola nnpingaja cyakabidi anu munda amu.” Mêmè ne: “Kanwena mwa kuzola kaacijengu aku kunshiya mêmè pambelu to, bwalu mêmè ndi mununange. Wamonu’s, kanwena mwa kucyenzaku to.” Mêmè ne: “Kudi bânà beetu bûngì cyanaana baa kunudi aku—baa kunudi aku badi bannange ne biikàle bangiitabuuje.” Mêmè ne: “Nwênù, mêmè—mêmè... Bôbò abu nebalwe, nansha bya munyi.” Mêmè ne: “Bôbò abu nebalwe. Nenku kanwena mwa kuzola cijengu kunshiya mêmè pambelu to. Nwênù bazole cijengu banshiye pambelu, mêmè ki wazola cyanyi cijengu kadi kunupingajamu cyakabidi.” Mêmè ne: “Panwenza cijengu cimwe, Nzambi, ku ngàsà Wende, neampeeshe mushindu wa kuzola cikwabo kadi kunukoka ne kunupingaja cyakabidi munda amu.” Ncya bushuwa, kubakoka ne kubapingajamu cyakabidi.

255 Nenku, mwaneetu, kaa, mu Dînà dya Kilisto mpeteku dyanyisha dya kwamba bwalu ebu. Ndi—ndi ne... Ndi mumanye ne ndi munkaci mwa kwangata dîbà mwab’ewu; kadi paabi dîbà dikaadi pa kukumbana bwa kwimanyika, ngeela meeji, kadi anyishaayi ngâmbèku bwalu ebu, nwamonu’s.

256 Nenku mêmè kwambila muntu awu, mêmè ne: “Ndi muswe kwenda neenu panucidi baswe kuyiisha Mifundu, ne kwikala ne dinanga, ne kwitabuuja ne—ne... ne kuyiisha ne kwamba ne nuvwa nubatiiza bantu... kabiya mu dînà dya ‘Yesu’ to, Yesu nkaayende. To, mukalenge. Ncya bushuwa ne mêmè—mêmè ncyêna mufwanyineku kwitaba aci to, bwalu ntu mumanyeku ba-Yesu ndambu; mubamanye mu Afrike ne mu myaba mishiileshiilangane, bantu bababiikila ne Yesu. Kadi nwênù bambe myaku eyi ya ‘Mukalenge Yesu Kilisto,’ nêngëndè neenu mwimanyine pa cyôci aci. Aci kaayi mbîmpè. Nêndamakananganè neenu. Ndi mêmè ngeela meeji ne bivwa bikengela nwênù kwanji kuteeka ‘Taatu, Mwânà, ne Nyuma Mwîmpè’ kumpala, wamonu’s, bwa kucivwija cikumbanangane.” Mêmè ne: “Ngeela meeji ne ki civwa cikengela nwênù kwenza ncyôci aci.”

Kadi yêyè ne: “Kaa, to, to! Aci, aci’s nkupingana ku busatu.”

Mêmè ne: “Kî mbusatu to. N’Nzambi umwepele mu midimu yisatu.”

257 Kî mbusatu, Nzambi yisatu to. Katwena ne Nzambi yisatu to. Cya bushuwa’s. Cintu bu nanku kacituku nansha. Kacivwaku cilongeshiibwe mu Bible to. Nenku kudi Nzambi anu umwepele. “Teeleja, Wêwè Izaleela, Mêmè ki Mukalenge Nzambi webe.” Nzambi umwepele! Mukenji wa kumpala: “Kwikadi ne nzambi

mikwabo kumpala kwanyi Mêmè to.” Cya bushuwa’s, Yèyè udi Nzambi umwepele, ki nyisatu to.

<sup>258</sup> Awu nngumvwijilu waci wa cyena Katolike; nenku civwa, cibangila mu Katolike ciya mu ba-Luthériens, amu nanku, ne bikwabo, kadi cikaadi ciitabuujiibwe cishaale mwasakanaayi munkaci mwa bantu bônso leelu wa Ndaaya ewu ne twètù tudi ne Nzambi yisatu.

<sup>259</sup> Nenku mwaba awu ki unwikala kanuyiku...Ewu Evanjeeliyo kaadyakuyaku kudi beena Yuda to...Bwalu, ngâkenza ciprofeta pa missionnaire mukwabo wa beena Yuda kuntu kwaka mu dinda kampanda. Kanwadyakutwadilaku mwena Yuda Nzambi wa busatu to. Kanwadyakucyenzaku to. Byôbi biine, yèyè kèna kwine aku to; yèyè udi ne ngumvwilu mwîmpè mupite awu. Nwamonu’s, yèyè udi ne dimanya pa bidi bitangila Bible kupita aci. Kadi Yèyè kacya kâtukù mwanji kwikala Nzambi pasatu to, bwa—bwa mwena Yuda. Wèwè mumwambile ne n’Yèyè Yehowah umwèumwè awu, neacyâkîdîle anu mpindyewu mene. Cya bushuwa! Ki mudibi, nwamonu’s.

<sup>260</sup> Nenku mêmè ndi ngiitabuuja byônso ebi. Anu mwâkambâ Yozefu ne: “Bânâ beetu, kanwikadi nwadifiikila nwênù biine munda to, bwalu Nzambi ngudi mwenze bwalu ebu,” nudi numona’s. Bwalu—bwalu cintu cidî...Bwa kumonaci mwa kwindila too ne pa dîbâ edi, kwajiki, bwalu cikondo cyetu cya baa Bisamba bya bende cikaadi cyamba kujika. Mpindyewu, ndi ngiitabuuja aci ne mwoyi wanyi wônso. Pa nanku nudi numona anyi, bânâ beetu wanyi? Ndi nteeta bwa kuya kafika ku cintu kampanda, cya ne, kasumbu kaa bantu aka, nkaa balume badi bapete dibatiiza dya Nyuma Mwîmpè.

<sup>261</sup> Kasumbu kaa Aimée McPherson, wakenza cinyi? Ûvwa dyambedi wa mu ba-Unitaires, ngeela meeki; pashiishe kupatuka kushaalye mwena Assemblée; pashiishe kutapuluka kadi kulwa kudilongolola mushindu mushiilangane; mwab’ewu anu abidi adi panshi aa, mmwenze kasumbu kakese, kaacintu kakese.

<sup>262</sup> Mvwa musômbe mu disangisha dya O. L. Jagers. Mpindyewu, twètù bônso tudi bamanye O. L. Jagers. Tatwëndè—tatwëndè ngwâkambulwisha ku dyanzabo dya Nsangilu Mujima wa Assemblées de Dieu. Mpindyewu, O. L. mmuntu munene. Mmuyiishi munene. Mvwa mumwambile, abidi mashaale aa, mmwambila ne: “Mwaneetu Jagers, bu mêmè mwa kuyiishaku mushindu wûdi wèwè uyiisha ewu, nunku ncyèna nansha ngenzaku disangisha dya dyondopa to.” Kadi yèyè ukaavwa ne byônso bya mashi ne mvinyo abi’s, ne bikwabo, pacivwaye anu ubangilaku kwine kuntu kwaka apu.

<sup>263</sup> Numfwileku luse, piikalabi ne ndi nnutapa ku mwoyi, bânâ beetu, pa bwalu abu. Mêmè—mêmè...Bidi anu bîmpè. Nzambi udi anu mwa kwenza ne mashi alwe, mvinyo alwe, anyi maanyi alwe, cyônso cidîYe muswe aci, kadi kî ng’aci cidî cilekelela



mpekaatu to. To, mukalenge. To, mukalenge. To, cya bushuwa's. "Mashi a Yesu Kilisto kaadyàkujimijaku bukole bwaWu to nansha kakese, too ne piikalà Ekeleeziya mujima wa Nzambi udi mupikula ne cya kusungidiibwa, bwa kàciyikù mwa kwenza kabidi mpekaatu to."

<sup>264</sup> Mêmè ne: "Mwaneetu Jagers?" Mêmè kumwangata; mêmè kumubiikila ku telefone. Piine apu mpâmvwà ne beena Kilisto baa Kantu-ku-Byanza. Ki mêmè kwamba ne, mêmè kwamba ne: "Mwaneetu O. L.?"

<sup>265</sup> Yèyè ne: "Udi penyi mene's?" Mvwa ku nzubu mukese wa cilaala-beenyi wa mushinga mupuutula lwà kwine kuntu aku. Ki yèyè ne: "Udi ujinga kungambila ne mwaba udibo bafucile bwa wèwè kusòmbèlapù ki wòwò ewu anyi?"

<sup>266</sup> Mêmè kwamba ne: "Ki dijinga dyanyi. Pângàakalwà kùdì wèwè," mêmè ne, "ciwakenza cinyi? Wèwè's wákantèeka ku cilaala-beenyi cya Statler Hotel kwaka, ki kukengelabi bwa mêmè kwikala mushaale mwimane anu kuulu mu ditumba. Kunsòmbeshabò ku meesa; nciyi mmanya ne nkeele kaayi kavwa kakengela kudya naaku to, anyi nî ncinyi cikwabo. Nenku ncivwa . . . Mêmè kupweka kuntu kwaka, nciyi muvwale nkoooci to, bakaavwa baswa kungeela pambelu." Nenku mêmè ne: "Mêmè—mêmè mwine nciyu mumanye mwa kupita naabi to."

Yèyè ne: "Nènye mêmè kakuteeka kwòkò aku, piikalà bòbò aba batambe kulandika bapange mwa kucyenza."

<sup>267</sup> Mêmè kwamba ne: "To, mukalenge." Mêmè ne: "Cìndì mêmè nkeba kwenza nkudya neebe cifweteka, pawikala muswe bwa kucisumba."

Ki yèyè ne: "Mbîmpè."

<sup>268</sup> Ki dîbà adi twètù kupatuka e kuya mu mwaba kampanda, twètù kusòmba. Ki mêmè kwamba ne: "Mwaneetu Jagers, n'cya bushuwa ne ndi ngumvwa kaneemu kààbùngì be bwa webe . . ."

<sup>269</sup> Wa bwalu yèyè utu mulunda wanyi munanga wa dikema, mwaneetu wa mushinga mukole. Nenku mvwa—mvwa ne kakanda kende kakese, ne yèyè . . . muvwaye mwakule bwa mwine mukaji ucivwa ufuminaku dyamwamwa dya mbù awu, mwine uvwa ne mashi mu byanza awu, ne bikwabo. Nenku mvwa naaku muneemu emu. Mvwa nkeba anu bwa yèyè kucivilaku musangu nansha umwe, paabi mêmè nyawu mvwa naaci mu cyende—mu cibejibeji cyende aci, nudi bamanye's.

<sup>270</sup> Mêmè ne: "Ndi mumone mùdì wenda uya, wenza, ukeba kubanga ditabuluja dinene." Bwalu, beena Kantu-ku-Byanza mbavwa bamvwije kuntwaku, mu bushuwa bwa bwalu.

<sup>271</sup> Mbimweke bu ne bantu mbafwanyine kumanya. Bìikalà Nyuma Mwîmpè mwa kusokolola maalu pa cibumba cya ku cyambilu, Yèyè awu kènàku mwa kungambila bidi byenzeka mu myaba kampanda anyi, bânà beetu?

272 Mémè ndi mwa kunwambila, ku mwaku ne ku mwaku, ne kunujaadikilaci kudi Mwaneetu Carlson, ne mwaneetu udi *apa* ewu. Mwawa musòmbe mu disangisha, makeelela awu, mémè kwambila bânà beetu aba bìwà mwa kwikala mwaba ewu mu dinda edi. Ncya bushuwa. Menemene. Nwamonu anyi? Bwalu Nyuma Mwímpè nguvwa mumbiishe, mwambe ne: “Juuka wimanyine lwà ku dididiishi.” Mémè kutangila, ku dididiishi aku, ki Yèyè kundeeja anu menemene *eci* nunku. Mémè kwamba ne: “Mpindyewu, bânà beetu . . .” [Mwaneetu wa balume mukwabo udi wamba ne: “Ncya bushuwa.”—Muf.] Ndi munuleeje cyòci *eci*, anu mu cyòci menemene. S’ki bwalu mbwòbù abu! Nwamonu anyi?

Mona’s, bôbò’s bavwa ne cya kucimanya.

273 Anu abidi àshàadi aa muneemu emu, muntu mmujuuke, mu Chautauqua emu, kwambaye ne: “Mwaneetu Branham mmuprofeta.” Ncitu ndyambaku ne ndi muprofeta to. Nwamonu anyi? Kadi kwambaye ne: “Mwaneetu Branham mmuprofeta padiye mu Nyuma wa bujinguludi, kadi,” yèyè ne, “kaa, Dilongesha dyende’s mmulungù. Nwatapaayi ntaala nwadimuka bwa Dyòdi adi.” Mémè kwela meeji, bwa muntu mulonge tulaasa, mufwanyine kwamba cintu bu nanku awu?

274 *Muprofeta* mbwena kwamba cinyi? “Muumvwiji wa Dìyì wa kudi Nzambi.” “Dìyì dya Mukalenge divwa dilwa kudi muprofeta,” nwamonu’s. Kadi, anu aci nkaayaaci, kacylene nî ncya diteeleja nî ncya dyamba to.

275 Kadi, twamb’eku twamb’eku, Mwaneetu Jagers. Ki mémè kwamba, yèyè kwamba, kaa . . . Mémè kwamba ne: “Ndi mumone mwaba wùdi wamba bwa mukaji udi ne mashi mu cianza cyende awu’s.”

276 “Kaa,” ki yèyè awu, “Mwaneetu Branham, aci’s ncya dikema ne dyanyina citambe cya kacya!”

277 Mémè ne: “Mwaneetu Jagers, ndi mukunange. Dyambedi, ndi muswe wânji kuteekaku cianza cyanyi mu cyebe amu. Twâmbèku ne tudi bânà baa muntu.”

Yèyè ne: “Cya bushuwa’s. Kadi bwalu budi penyi?”

278 Mémè ne: “Wèwè ewu’s udi umwe wa ku bayiishi baa batambe kwikala baa bukole bânkaadiku mémè ewu mumanye. Mushindu mwine wùdi—wùdi cyamu cya mudimu bwa Nzambi’s we!”

279 Yèyè ne: “Twasakidila, Mwaneetu Branham. Ncya bushuwa ne wèwè udi ne kudipwekesha kwàbûngì.”

280 Mémè ne: “Ncyèna ngamba aci bwa kudipwekesha to. Ndi ngamba nanku bwalu ndi nciitabuuja. Wèwè udi musadidi wa Nzambi.” Kadi mémè kwamba ne: “Mwaneetu Jagers, wèwè kuyi. . . Udi—udi utamba kulaluka be; kwènàku ne cidi mwa kukandameena byùdi wamba to. Udi ushindamijila . . .”

281 Ne ki lutatu lùdiku bwa bààbûngi beenu nwênù beena Assemblées de Dieu, ne bakwabo bantu, pa bidi bitangila masangisha a dyondopa aa. Kî ndinudyula nnudyula to. Kudi bintu byàbûngi be bidibo babiikila...Ne Tommy, mwaba ewu, mmwaneetu mwimpè, ne tudi bamanye mushindu udiye mwimane mushindame. Kadi kudi bintu bûngi cyanaana mu ditunga emu leelu wa Ndaaya ewu babibiikila ne ndyondopa dya kudi Nzambi, kabyena bikemesha to panùdi kanùyi baswe kutuudila disangisha kampanda mfranga mu cimenga emu. Badi balwa basuna mfranga ya bantu, kadi kupatuka kuya. Kadi cidibo naaci ncinyi? Badi bapa bantu anu ndambu udi kayi nansha mupite binutu nubapa pa cibumba cya ku cyambilu to, mu cyambilu cyenu nwênù biine. Kadi nudi babinge, bânà beetu. Nya'nnwambila, nudi babinge. Kadi bidi anu mudi... .

282 Mvwa mbala bwalu bulonda bwa Martin Luther. Mbambe ne: "Kacivwa bwalu bupite luumvu to mùvwà Martin Luther mufike ku ditontolola ekeleeziya wa Katolike, ne kupanduka." Nukaadi babale bwalu bulonda bwende abu. "Kadi mushindu wàkafikà Martin Luther ku dyepuka dya dikolesha dyònsò dya maalu dyàkalondà ditabuluja dyende adi, ki cidi cipita luumvu ncyòci aci."

283 Nenu padi cintu cya dikema ne dyanyina cyenzeka, bàdì kabàyi batengudiibwa bàdi bàlonda, anu mwakenzekabi mu Ejipitu. Ne ciine aci citu anu citwaletwale lutatu mu ditunga. Tudi bamanye nanku, patutu tupatuka tuyamu. Cyòci aci, cyakajuula Kòlà, nenu byakakengela bwa Nzambi acibutule. Kadi, bânà beetu, kî ndinudyula nnudyula to.

284 Mwaneetu Jagers kusòmbayè mwaba awu kadi kuteeta bwa kungambila ne Nyuma Mwimpè nguvwa wenza cyòci aci. Ki kwambaye...Ki pashiishe mèmè kupeta, mu cibejibeji cyende yèyè mwine aci...Mèmè ne: "Mwaneetu Jagers, mpindyewu," mèmè ne, "mèmè ewu's ndi mulongi wa mu kalaasa kaa mwandamutekete. Kadi wèwè udi Docteur mu Bunzambi, mulonge kabidi bwa kwikala ndùmbùlùlà. Batu bakukoleshile mu ekeleeziya mukezuke, wa kaneemu kààbûngi, wa Assemblées de Dieu. Tatwèbè's ngwàkawkàcisha bwa kujuula diine diitabuja adi. Nenu wèwè mutapuluke, aci's ncikutangile anu wèwè." Kadi mèmè ne: "Aci ncitangile muntu kana yònsò ewu, udi muswe kwenza nanku. Mèmè ncyèna ngelapu mukalu to. Kadi pakaadibi bikafika ku ne cyamu cya mudimu bu wèwè ewu, mufwanyine kupetela Kilisto binunu bya misuuka, washila mudimu webe wa bwambi pa disaluka kampanda's." Mèmè ne: "Mwaneetu Jagers, wibaka dikunji dya mushindu *awu*, paudi kuyiku ne cidi mwa kukandameena ciine aci, s'necidishinde paanyima paa cikondo kampanda. Kadi bidi bikengela wikaleku ne Mufundu bwa cyùdi wamba aci's."

Yèyè ne: "Kudi Mufundu."

Mémè ne: “Wutwalaaku.”

<sup>285</sup> Yèyè ne: “Ee, Mwaneetu Branham,” yèyè ne, “Nyuma Mwimpè’s ngudi wenza cyôci aci.”

<sup>286</sup> Mémè ne: “Ndeejaaku anu Mufundu mwaba udiWu mwambe ne, Nyuma Mwimpè ukaadiku mwenze bwa mashi kupatukawu pambidi paa muntu, ne bikwabo, mushindu awu. Wuleeje anu cyanaana; maanyi apatuka munda mwende. Wêwè wambi ne: ‘Maanyi awu avwa mbwa dyondopa dya kudi Nzambi.’ Wambi kabidi ne: ‘Mashi a mukaji awu neikale bwa lupandu lwa bukwa matunga.’” Mémè ne: “Piikalabi nanku, kadi Mashi a Yesu Kilisto àyi penyi? Ôwò’s ngadi umusha. Ne cyônsò cidi cibènganganà naaWu aci, ncifwilakanyi. Cidi cibèngangananaaWu.” Mémè ne: “Cidi cilwa dilongesha difwilakanyi ne Kilisto.”

Yèyè ne: “Kaa, Mwaneetu Branham, wadyakuyiilaku dîngà dituku’s.”

<sup>287</sup> Mémè ne: “Ndi ne ditekemena dya ne ncyadyakuyiilaku mushindu awu to. Mpindyewu, mwaneetu,” mémè ne, “ndi mukunange, kabidi udi mwaneetu.” Ki mémè ne: “Mwaneetu Jagers, wêwè’s uyaaya kabànda pa katamba, paanyima paa cikondo kampanda, mu mushindu wà kùyi umona mwa kukùtùuluka to. Alukila ku ekeleeziya wenu, alukila ushaale ne Evanjeeliyo.” Ki mémè ne: “Kùcyàshìdì pa masaluka to.” Mémè ne: “Kùdì . . .”

<sup>288</sup> Mpindyewu yèyè mmupete, ùkaadi ùbàtiiza bwa Mwoyi wa Cyendelele, bwa nwènù kumanya’s: “Musangu wònsò wùdi ubatiiza, udi walukila ku bunsongaakaji anyi bunsongaalume. Mpindyewu aci neciikale mwa . . . Kwàdyàkufwàku to (nansha kakese).” Nunku, aci, cyôci, ùkaadi ku lusongo lwa katamba patudi twakulangana apa; nunku “tumuma twa vitamines twa mu Mbù Mufwe” atu. Nwamonu anyi? Kadi ki mudici amu, mwaneetu, paudi ubangila pa tuumasaluka tukese tukese atu.

<sup>289</sup> Nunku nwènù badi mwab’ewu badi ne maekeleeziya aa, panudi nulekela cintu cya mushindu awu cibwela mu cimenga, nunku, nudi bamanye’s, dyabulu utu mudimuke, nunku udi—udi utupika ubwelelamu ku bintu bya mushindu awu abi. Udi ujuudilapau makokyanganyi. Udi—udi wenza ne bantu badimone bakaadimu, ne udi ujuula bibwejàkàjì mu ekeleeziya, ne bikwabo. Kadi kabyena nanku to.

<sup>290</sup> Mpindyewu, tangilaayi. Nansha wêwè mubinge munyi, cintu cimwepele citudi tupangila ne ciikàle citupicila ncyôci eci, bânà beetu wanyi. Mpindyewu nkaadi njikija, mwikale ngamba nunku. Nansha mémè mwikale mubinge bishi, nansha mémè mwikale mu Mifundu bishi, ne nansha mémè mumanye Bible wa Nzambi bishi; mémè nciyi ne Nyuma wa Nzambi to, wa dinanga, mu mwoyi wanyi, bwa bukwabantu bujima ne bantu bònsò, dîbà adi ndi mupiile anu kwine kwònsò aku.

<sup>291</sup> Mpindyewu, Pòlò mmwambe, mu Kolinto wa Kumpala 13 ne: “Nansha mèmè ne dimanya, nwamonu’s, mwikale ngumvwa maalu masokoka ônsò a Nzambi, nwamonu’s; mu byônsò, kwimana; kadi nciyi ne luse to, ndi cintu cyanaana. Ne nansha mèmè ngaakula mu myakulu ya bantu ne ya banjelo,” ki yinutu nwakula naayi kudi Nzambi ayi, ne yidibo misangu yônsò kabayi mwa kwandamuna ayi. “Nansha mèmè ngaakula mu myakulu, myakulu ya bushuwa ya bantu ne ya banjelo, kadi nciyi ne luse to, dinanga, kabayena ne cidibi bimpetsha to.” Nenku mèmè mumanye maalu masokoka a Nzambi ônsò, ne mwikale mwa kuàvùngulula ne—ne kuàtwàngaja ônsò, kadi nciyi ne dinanga to, bidi bikwacisha ku cinyi? Ne pândi . . .

<sup>292</sup> Yesu wakamba ne: “Ku cyôci eci nkwanumanyina bantu bônsò ne nudi bayiidi Baanyi, mpanudi ne . . .” mpadi beena Assemblées biikàle ne dinanga bwa ba-Unitaires, ne ba-Unitaires biikale ne dinanga bwa beena Assemblées, “panudi ne dinanga, muntu bwa mukwende,” nansha mubinge nansha mupiile. Nenku padibi anu ne kiipacila nkabi, kabingila kiikàle kabi, kabingila’s we, dîbà adi udi mupiile anu kwine kwônsò aku. Kî ncyà bushuwa anyi? Nwamonu’s: “Nansha mèmè ngaakula mu myakulu ya bantu ne ya banjelo, kadi nciyi ne luse to, ncyèna anu mwanji kwikala cintu to.” Bwalu, Nzambi udi dinanga. Tudi bamanye nanku.

<sup>293</sup> Ne mèmè ntu ngiitabuuja mu dyakula dya mu myakulu. Mpindyewu, muntu mukwabo uvwa wamba ne: “Mwaneetu Branham katu witabuuja mu cileeji cya mbangilu to.” Ndi njinga kunutookeshilaci mpindyewu. Nwamonu anyi? Ndi njinga kunwambila.

<sup>294</sup> Ndi ngiitabuuja ne padi muntu wakidila Kilisto, udi wakidila citupa cya Nyuma Mwîmpè. Bwalu, Yesu mmwambe mu Maataayi nshapita wa—wa 12, nshapita mwi5 ku mvensa wa makumi abidi ne . . . mvensa wa 24, nkudiYe mwambe. To, Ndi ngeela meeji ne mmu Yone Munsantu 5:24. Mmwambe ne: “Ewu udi uteeleja Mèyi Aanyi, ne witabuuja Ewu wâkantùmà Mèmè, udi ne Mwoyi wa Cyendelelele.” Mpindyewu, kudi mushindu wa Mwoyi wa Cyendelelele anu umwepele. “Ne kaakubwela mu dipiila to; kadi wamanyi kuumuka ku lufu wayi ku Mwoyi.”

<sup>295</sup> Mpindyewu, ndi ngiitabuuja ne muntu nansha umwe kêna mwa kudibiikila yèyè mwine to; bikengela Nzambi amubiikile. Ne piikalabi bulelela ne Nzambi ngudi mumubiikile . . . Kadi kudi bantu bapite bûngì, tudi bamanye’s, bânà beetu, mwikàle anu musaluke kadi kudiyambidila ne Nzambi mmumubiikile, kadi nsòmbelu wende abidi mmale asatu mmîpì . . . kusangana, wèwè’s udi ujangula cyôci aci. Kadi Nzambi mukubiikile, mona’s, udi, newikaleku, ne neushaale anuku, wamonu’s, umanya. Nenku pashiishe piikalabi ne . . . Mpindyewu, adi kî dilongesha dya ba-Baptistes to. Nudi bamanye nanku, nwamonu’s.

296 Kadi, ncyêna ngiitabuuja bya dilabuulangana dya ku cyanza kadi kwikala ne dikubiiibwa dya Cyendelele, ne mu bintakanyi byônsò bya nanku awu abi to. Ncyêna—ncyêna ngiitabuuja abi to, nansha kakese. Padibo bôbò baswe kwitabuuja abi, ee, bidi anu bîmpè. Ndi ntungunuka anu ne kwamba ne badi anu bânà beetu.

297 Mu dinda emu, bu mêmè mwa kulomba cipese cya dyâmpà dyela bimuma, (bwalu dîbà diine dya didya dya mundaamuunya's nya' dikaadi dyamba kwakana), ndi mwa kuswa dyâmpà dyela tumpùlùmànjà, ne wêwè udi mufwanyine kwangata pomme, kadi twètù bônso tudyadya anu dyâmpà dyela bimuma. Nwamonu anyi? Pa nanku kabyena byenza. . . bu mutudi tudyana anu dyâmpà dyela bimuma.

298 Mushindu awu ki utudi twitabuuja. Pawikala muswe kwikala Unitaire, ikala Unitaire; pawikala muswe kwikala mwena Assemblée de Dieu, ikala mwena Assemblée de Dieu. Pawikala muswe kwikala nî ncinyi cyônsò cyûdi aci, Baptiste, Presbytérien, ikala mwena Kilisto mwômù amu. Wamonu anyi?

299 Nenku—nenku wacikenketa anu bwebe wêwè mwine, kadi kanubangi makokyanganyi muntu ne mukwende to. Bwalu, tuntu tukese etu, tutu twônsò tunwangana. Ncya bushuwa. Tunwangana twônsò ne tukafika anu pa kaaba kamwepele aku.

300 Nenku—nenku nansha citudi twenza ciikàle cinyi, bûngi bwa bishima bitudi mwa kwenza, bûngi bwa mikuna yitudi mwa kutentemuna, anyi nî ncinyi cyônsò, patudi anu katuyi tufika pa kaaba kaa twètù tunanga, kabiyi bya budîngîbudîngî to, kadi tunangangana muntu ne mukwende. Patudi tunanga mwaneetu ne mwaneetu yônsò, nansha yêyè mwikale wa mu ekeleeziya kaayi, tudi tumunanga; kabiyi bya twenza bu bamunange ne, mbwalu tudi bamanye ne citu mmwenenu wa cyena ntendeleelu, wa ne, “Tudi ne cya kucyenza” to. Kadi, bwalu tudi tucyenza, tudi banangangane muntu ne mukwende; pashiishe, mwoyi mule, biikàle tutwalangana muntu ne mukwende.

301 Kabidi ndi ngiitabuuja ne, mu Kolosaayi 3, lwà ku 9 aku, mwaba kampana lwa muntwamu. . . Ndi mufwanyine, ncyêna—ncyêna. . . Ndi mufwanyine kwikala mutupakane pa bidi bitangila Mufundu awu, kadi Wôwò awu mmwambe cyôci eci. Paanyima paa twètù bamane kulwa beena Kilisto, katwena ne cya kwikala ne lukuka to. Nwamonu anyi? Katwena mwa kwikala ne diitabuuja patudi tukeba bwa kupangana kaneemu ne luumu muntu ne mukwende to. Nwamonu's, katwena mwa kwenza nanku to; katwena mwa kwikala ne diitabuuja to. Nzambi ngudi ukengela twètù kupa luumu, nwamonu's kuMupa Yêyè luumu. Kwitabuuja bânà beetu, cya bushuwa, ki dinanga; kadi kaneemu ne buneeme biyaaya kudi Nzambi! Bwa. . . Kadi nwikale ne diitabuuja ne dyeyemenangana muntu ne mukwende. “Nenku kanudingyanganyi muntu ne mukwende to.”

Nwamonu anyi? “Kanudingyanganyi muntu ne mukwende to.” Mêmè mukwambile mu dinda emu ne: “Ndi mukunange,” ndi ne cya kucyambilamu. Kabiya nanku to, ndi mwena lubombo. Aci kadi ke menemene.

<sup>302</sup> Mpindyewu, bânà beetu, mu mushindu umweumwe ewu . . . Mpindyewu, Mwaneetu Tommy, ndi ntekemena ne ncyêna anu munulame bitambetambe mwab’ewu to. Ndi . . . Mwaneetu Tommy udi ne kaabwalu kaa dyamba mu katanci kakese emu. Kadi ndi mufwanyine kwamba nenku, pângààkafikà munkaci mwenu . . .

<sup>303</sup> Ndi ngiitabuuja nunku. Ndi ngiitabuuja ne Nzambi Taatù wetu wakabwikila virgo kampanda mundidimbi dînà dyende Mariya, ne wakafuka munda mwende kabulu kaa Mashi kààkatwâlâ Yesu Kilisto, uvwa Mwânâ wa Nzambi awu, tabernacle mwâkaDibwikilâ Nzambi, mu musunya, muDimweneshe munkaci mwetu. “Nzambi uvwa munda mwa Kilisto, upungisha baa pa buloba ne Yêyè mwine.” Ndi ngiitabuuja ne kabulu kaa Mashi aku kaakataayishiibwa ku Kalvariyo, bwa dilekelediibwa dya mpekaatu yetu. Ki Nyuma kupatuka mu Yêyè ne kwalukila pa Ekeleeziya, bwalu, Kilisto awu, Nyuma Mwîmpè; Kilisto awu, Logos awu, uvwa munda mwetu mpindyewu, Nyuma Mwîmpè, ku dibatiiza. Mwikale utuwija . . . Kilisto kuDyabulula, ufila Mwoyi Wende kudi muntu ne muntu wa kutudi, bwa ne twêtù, bu cisumbu cya bantu, twamona mwa kwikala Ekeleeziya wa Nzambi. Ne kî nkwanji kwenza matuku àbûngì to . . .

<sup>304</sup> Mêmè mvwa ne ciibidilu cya kubanda pa tubalu. Nudi bamanye nanku. Taatù wanyi mêmè uvwa mubandi wa pa tubatu, wa dilambu. Mvwa ne ciibidilu cya kubanda pa tubalu. Tuvwa tusaka nyama—nyama . . . mu cibandabanda cya Arapaho Valley, anyi ndi njinga kwamba cya Troublesome River, luseke lukwabo lwa mpâta wa Arapaho Range. Beena Hereford Association ki batu badiisha nyama mu cibandabanda aci. Nenku mu cibandabanda aci, beena mudimu baa ma-fermes, batu—batu ne bisoosa bipite bûngì bitubo mwa kukolesha. Nenku padi ferme kampanda upatula bisoosa bya kwelela nyama kilô mitwe ku cinunu, udi mwa kuya ne ngombe webe mu—mu mpâta awu, lwà kwinshi kwa Estes Park kwaka, udi mwa kuya ne ngombe webe mu miine mpât- . . . Myaba yaanyi minene ya ditwila buluwâ, lwà mwine muntwamu. Ne nkaadi mwenze mudimu mu ferme awu cidimu cijima. Ncitu anu nyamu, mu Muvù wa bintu bitoloka ne Muvù wa mabeji apoopoka, pândi nciyi ne cya dyenza to ne mêmè mwikale ne mushindu, bwa kuya kenza dikungwija dya ngombe, anu bwa kwikala ku mikuna aku, bwalu ntu munange kubânda pa tubalu. Nenku mu dibândâ dyônsò ne mu dipweka mu ferm- . . . mu cibandabanda aci, kudi musûmbâ wa beena ma-fermes bâdi ne bukenji bwa kwikala kubwelamu, ne kudiishilamu ngombe yabo. Nenku mu Muvù wa

bintu bitoloka, misangu yàbùngì, ntu nkaadi mubàmbùlwishe ku dikungwija dya ngombe kaaba kamwe ne diyisaka bwa kubànda naayi ku mikuna kwaka.

<sup>305</sup> Nenku kutu lupangu lwa tukanu, ludi luyipangisha bwa kulaluka kuya kabwela mu bitupa bya malaba bya bende, miikale yipweka yikosolwela mu mukalu. Too ne... Nenku mulami wa diitu mmwimane mwaba awu mwikàle ùbala ngombe ne ngombe padiye ubwela, padiyi yibwela apu. Nkaadiku musòmbèsòmbè, matuku àbùngì, ku dībà ne ku dībà, ntangila muvwa cisumbu cya Mukalenge Grimes cibwela, yêyè uvwa ne Diamond Bar; cyetu twètù civwa ne Turkey Track; nenku bavwa ne—ne Tripod anu lwà kwinshi kwetu aku; ne Jeffreys, ne bikwabo. Nenku pâmvwà ngeela cibelu, mudi bààbùngì beenu bamanye, luseke lukwabo lwa cikwacilu cya ciseba cya kusòmbela apu, nenku nsòmba mwaba awu ntangila muvwa mulami wa diitu awu pavwaye mwimane mwaba awu, ubala ngombe eyi.

<sup>306</sup> Mémè kumona cintu cimwepele. Kavwa utamba kutuma meeji ku cimwenenu civwa pa ngombe aci to. Kadi kuvwa cintu cimwepele civwaye utamba kukenketa, civwa ncimanyinu cya mashi aci. Bivwa bikengela kwikalaye dimiinu dilelela dya Hereford bwa cyanana kavwa uyaku dyamwamwa dya lupangu alu to, kadi cimwenenu aci kacivwa cifila dishiilangana dyàbùngì to.

<sup>307</sup> Nenku ndi ngeela meeji ne mushindu awu ki wikalabi ku Cilumbulwidi. Yêyè kaakutangila ku cimwenenu cyetu to, kadi Yêyè neakebe cimanyinu cya Mashi aci.

<sup>308</sup> Mémè ndi ne byanyi bilema bîndi mwenze, bânà beetu, ne ntu mwenze bintu byàbùngì bivwa bibi. Ne piikalabi ne nansha dībà kaayi dyònsò mu njila mûnyaayà ndi mutwale, anyi ukaadiku muumvwe cintu kampanda cîndi mufwanyine kwikala mudyulangane naaci anyi mwambe, citapangane ku mwoyi mu mushindu kampanda, anyi piikalabi ne ndi mwambe cintu kampanda mu dinda emu ciikàle citapangane ku mwoyi, ndi nkulomba, wêwè bu mwaneetu mwena Kilisto wa balume anyi wa bakaji, umfwileku luse. Ncyèna ne meeji a kucyenza to. Ndi anu munukangwile mwoyi wanyi, bwa twamona mwa kumanya.

<sup>309</sup> Piikalaku dibatiiza kampanda didi dikengela kwenza, nwênù bânà beetu nùdyènzàayi, nwênù biine, nwamonu's. Mbwena kwamba ne, mémè—mémè ncyèna ndyenza to. Byòbì bikengela ne mémè mbatiize, mushindu awu ki wùngààbatiizà, dya nanku awu. Nenku yònsò wa kunudi udi mwa kudyangata, nwamonu's. Pa nanku nudi mwa kwangata muntu, mubatiijibwe mu Dîna dya Taatù, Mwànà, ne Nyuma Mwimpè, ne mubatiijibwe mu Dîna dya Mukalenge Yesu Kilisto, aci kabidi. Pa nanku bu byòbì mwa kwenzekaku ne



mémè mbatiize muntu . . . kadi ncyèna mwanji kucyenza to. Ntu mbatiiza anu mu ekeleeziya wanyi mémè, ne badi anu bantu bàdimu abu. Ne mushindu awu ki udi bantu baa mu wanyi ekeleeziya babatijiibwe. Kadi nwènù baswe kutuma mèsù paanyima, aci mmushingà wa kale wa ci-Missionnaire, mushingà wa kale wa ba-Baptistes Missionnaires. Nenku mpindyewu bu byôbì ne. . . Ki cyôci aci.

<sup>310</sup> Ntu ngiitabuuja dyondopa dya kudi Nzambi. Ntu ngiitabuuja dibatiiza dya Nyuma Mwîmpè. Ntu ngiitabuuja mu—mu Nyuma Mwîmpè wakula mu myakulu. Ntu ngiitabuuja dipà ne dipà dyônsò ditu Nzambi mupeeshe Ekeleeziya Wende. Ndi mbiitaba, lukama pa lukama. Kadi ntu ngiitabuuja . . .

<sup>311</sup> Ncyèna ntwa nyama ku mikolo bintu bya dyondopa dikwatakaja bitudi naabi eku ne eku leelu ewu abi to. Ndi njinga anu kwenza dîyî dya kadyuwu edi mwab'ewu. Cikondo kampana kuvwa mwaneetu mukwabo . . . Kadi kî m'Wwaneetu wanyi wa mushinga mukole Tommy Hicks to, ûndî ngangata bu musadidi mulelela wa Kilisto ewu. Kuvwa muntu mukwabo mu ditunga dikwabo, ne mu diine ditunga adi muvwa . . . Yêyè awu uvwa muntu anu, misangu yônsò ne: “Nzambi mmwondopi mulenga mulayà! Mwondopi mulenga mulayà,” nudi bamanye's, mushindu awu.

<sup>312</sup> Ki mémè kupeta mukanda mufunda paanyima paa muntu awu mumane . . . ufumina mu ekeleeziya wa ba-Luthériens. Ne kàleelèkî wanyi ewu mmumanye ne tudi naawu mu mikanda milama. Ncyèna muswe kuteela dînà dya muntu awu to, bwalu aci kaciyena cimweka bu bwena Kilisto to. Nansha nanku, mémè ndi mbèngangana ne mmwenenu wa muntu awu, kadi aci cidi anu cîmpè menemene. Ndi mumunange. Yêyè mmwaneetu.

<sup>313</sup> Kadi kufikabi anu mu mushindu wa ne bivwa bikengela anu kwikalabo ne disaluka dya mushindu kampana, anyi dizunzuka, anyi cintu kampana cikwabo cya mushindu awu, nwamonu's. Nenku, aci, kî ncîmpèku to, nwamonu's. Mwaneetu. . . “Diibidija dya mubidi didi dyenza maalu makese menemene.”

<sup>314</sup> Ki mwambi wa ba-Luthériens ewu kwandamunaye ku mu—mu—mukanda wa mwambi ewu. Ki kwambaye ne: “Nwènù batangadiki baa beena Amerike bàlwalwà muneemu aba,” yêyè ne, “ne dyondopa dyenu dyônsò dilenga dilayà dya bantu bônsò adi!”

<sup>315</sup> Nenku mpindyewu eci cidi cimweka anu bu kasumbu kakese kaa bilôngò bwanyi mémè mwine's, kadi Nzambi mmumanye ne ncyèna ne meeji a kucyamba mu mushindu awu to. “Kadi,” yêyè ne, “pa—pavwa Deborah Stadskev mwànà mufwe, mwànà wa mu diboko awu, ne pààkiimanà maamù awu mwaba awu diine dituku adi mu India-. . . mu Californie, mùvwà mwànà awu mufwile amu, ne mukwate mashika. Ne mumone. . .

kulaadikaye mwânà awu mu diboko dya Mwaneetu Branham, ne yèyè mwimane mwaba awu umusambidila. Ki mwânà awu kubanga kwela mbila ne kusuba mikolo; ki kumupingajilaye maamù awu.”

316 Ûvwa kabidi mumanye bwalu bwa mu Mexique abu. Bwine abu, tudi mwa kubuteeka pa byakambabo kudi beena Kantu-ku-Byanza baa Evanjeeliyo mu Kaabujima. Bikengela wikale ne cintu kampanda cidi ngangabuka mwambe. Paakafwa mwânà mukese wa mu Mexique awu mu dinda adi, pa dîbà citeema jaajaaja, kadi tukaavwa dîbà dikumi ne umwe jaajaaja bufuku abu. Ngangabuka nguvwa mufunde mêyì ende awu. Mwaneetu Espinoza, udi bààbûngì baa kunudi nwênù beena Assemblée de Dieu bamanye awu, yèyè nguvwa mukangate kiine kabeji kaa mêyì aku kudi ngangabuka, bwa ne mwânà ùkaavwa mufwe.

317 Ki mêmè kumona cikeena-kumona lwà kumutu kwa musumbà wa bantu awu, pàakalwà beena Katolike binunu makumi abidi kudi Kilisto, mu Mexico City mwamwa. Mêmè kwamba ne: “Kanwangaciku aci to. Ncyêna mumanye, mwânà awu. . . Ndi mfuma ku dimona cikeena-kumona mwaba ewu.”

318 Ne Billy uvwa mwaba awu, uteeta, ne baawisiyè makumi asatu anyi makumi anaayi, kabayiku mwa kupangisha mukaji mutekete awu bwa kubwela mu mulongo wa babeedi to, ne mwânà wa mu diboko awu. Ûvwa yèyè mwa kubwelela anu lubilu mwinshi mwa mikolo yabo amu, ne bikwabo. Ki, ndekeelu wa byônsò, mêmè kutuma Jack Moore bwa kukuyaye. Mêmè ne: “Ndaaku, umusambidile wêwè.”

319 Ntuma mèsù lwà mwab’ewu, ki mmona mwânà mukese wa beena Mexique ùfùkisha mimwemwe. Mêmè ne: “Indilaayi kakese. Lwâyi nende apa.” Nwamonu anyi? Kadi ndi mwenze anu ntenteka byanza byanyi pa mbulankete awu. . . Kuvwa mvula wa yebeyebe, dituku dijima. Paabo bavwa anu kacya biimana mwaba awu kacya ku dinda dya bwebwebwe, kadi dîbà adi nyawu tukavwa dîbà dikumi ne dimwe bufuku abu. Ki mêmè kutentekela mwânà mukese awu byanza. Kubangaye kusuba mikolo ne kwela mbila. Ki kuditwabo mu dyela dya mbila ya mikole.

320 Pa nanku, ki kupwekabo nende bwa kupeta bujaadiki bufùnda. Kuyabo kudi ngangabuka, ki ngangabuka kwamba ne: “Mêmè nguvwa mwambe ne mwânà ewu mmufwe, mu dinda emu pa dîbà citeema jaajaaja. Ûvwa mufwe disaamà dya bisulusulu.” Nwamonu anyi? Nenku dîbà adi maalù awu ngaa—ngaa—ngaa bushuwa. Mbintu bifùnda. Bikengela biikalè nanku.

321 Bivwa bikengela twêtù kwikala misangu yônsò anu bàà kweyemenyiibwa ne bambi bàà bulelela pa bidi bitangila cintu kana cyônsò. Kucivwijiku. . . Uicilekele ciikàle anu mudici amu. Uicilekele. . . Nzambi katu dijinga ne dikwacisha nansha dikese

pa cintu nansha cimwe to. Nudi numona's, Yèyè—Yèyè—Yèyè udi Nzambi.

322 Pa nanku ki kwambaye nenku ewu mpindyewu: “Kadi maamù ewu paakabiikilaye Mwaneetu Branham mu Amerike apu, umudidila mwadi ku telefone ne: ‘Lwâ kwôkô ujuule mwanaanyi mukese wa mu diboko ku lufu!’ Ke Bukalenge bwa États-Unis. . .”

323 Bayende mmuyiishi mu Cilwilu cya masalaayi. Nwênù bônso nudi bamanye Julius, bààbûngì beenu mbamumanye; mwine utu mufunde mukanda wanyi wa ne, *Mupròfetà Ûdi Ûkùmbula Afrikè* awu.

324 Kadi maamù mutekete wa ba-Norvégiens mukwate ne bya luse awu, wela mbila mikole, mutu wamba kupandika, wamba ne: “Mwaneetu Branham, mwawa mwimane mwaba awu pàakabiikà mwànà wa mu diboko awu ku lufu!” Yèyè ne: “Twètù tudi twitabuuja ne wêwè udi musadidi wa . . . wa Kilisto.” Yèyè ne: “Lwâku, utentekete mwanaanyi wa mu diboko ewu byanza, ne yèyè neikale ne mwoyi.” Ûwva ufuma ku difwa anu katanci kake, mufwe disaamà dya bisulusulu; ùwva musaame mēbà anaayi, anyi ataanu.

325 Ne bantu aba bavwa banyungulukile mwaba awu, beela mikunda ne mbila ya mikole, batupika muulu, bamba ne: “Nzambi's neamubiishe ku lufu! Nzambi's neamubiishe ku lufu!” Biikàle bamba . . .

326 Ku cyôci aci, kumpanyi wa Amerike wa Ndek- . . . anyi, ki ngwa Amerike wa Ndeke to. Cilwilu cya États-Unis civwa cikeba kungambula mu kandeke kaa jet, diya ne dyalukila, mu dituku dimwe amu. Nwamonu anyi?

327 Ki mēmè ne: “Kumpala kwa mēmè kulwa, ngānjì nkebe diswa dya Mukalenge.” Ki mēmè kusambila, matuku abidi. Awu ngangabuka wa bwalu mwikàle wa maalu mīmpè be bwa kushiya mwànà awu mulaadika mwaba awu.

328 Pashiishe, dinda kampanda, mēmè kukatamuka kadi kwasa diya bwa kabwela mu cikukù. Mēmè kutangila, kuvwa kwimane mwaba awu, lwà kuulu aku, anu Bukēnkē bunene bwipacila bukēnkē bûdì mwaba wawa naka bwabwa, bunyunguluka, bwamba ne: “Kulengi aci to. Kutandishi aci to. Ncyanza cya Mukalenge.”

329 Mēmè kwalukila lubilu e kumanyisha ku telefone ku ditunga adi, mēmè kubiikila ngamba ne: “Ncyēna—ncyēna mwa kulwa to.”

330 Ki mwambi wa ba-Luthériens ewu kwambaye ne: “Bwa cinyi kanūyikù windila bwa kupeta dipangadika dishindame dya kudi Nzambi, mwākenzà Mwaneetu Branham amu? Bwa dībà adi umanya ciine cyūdi wamba aci ne ncinyi.”

<sup>331</sup> Mpindyewu, ki cyòci aci, bânà beetu, twìkalakù katuyi tutupikila anu lubilu ku dyoya dya myanda; kadi kwindila, ne kupeta dipangadika ditooke too, dishindame dya kudi Nzambi.

<sup>332</sup> Kadi byònsò bìdì muneemu emu ebi, dyondopa dya bangènzàmpèkààtù bàdì kabayiku ne cidibo bamanye pa bidi bitangila Nzambi. Mémè ndi ngiitabuuja ne dyondopa dya kudi Nzambi ndishindameene pa dīyì dikulu kampanda, dya ne bivwa bikengela bwa wèwè kulwa kudi Nzambi, dyambedi, ne kuMupeesha mwoyi webe, ne kusukula myoyi yenu mu Mashi a Yesu Kilisto, ki pashiishe Nzambi akwate neebe mudimu ne akwondope. Anu mwāmbì mwaneetu wenu, pa bidi bitangila mukaji mutekete uvwawe musambidile kuntu kwaka, munsantu wa Nzambi awu, nwamonu's.

<sup>333</sup> Mu nsòmbelu wanyi, nkaadi mwenze bilema byàbùngì. Nkaadi mwenzenze bintu byàbùngì bivwa bibi. Pàmwāpa, bu mémè mwa kutungunuka ne kwikala ne mwoyi, nēmbýēnzè kabidi bipite búngì. Pàmwāpa bimwe bya ku byòbì nebiikale bilendwishi mu njila wenu. Ndi ntekemena ne nenumfwileku luse.

<sup>334</sup> Mvwa mbala maalu a Abraham, muvwaye ne dipututuka dipite. Muvwaye, ekelekele, bintu byakenzaye's; mwele Nzambi mpatà; mudinga pa bivwa bitangila mukajende; ne bikwabo byònsò. Kadi paavubu kufunda dyambulula dya maalu ende kudi Nzambi mu Loomo 4, kī mbateejeku bilema byende to, kadi mbambe ne: "Abraham kaakatenkakanaku kacya" mu bupidya. . . kudi Nzambi to, "kadi ùvwa anu ne dikanda." Bilema byende byònsò baakabipwa mwoyi byònsò, paakafundabo dyambulula dya maalu a nsòmbelu wende kudi Nzambi. Dipututuka dyende adi kabaciyi baditeejaku nanshà to. Bilema byende abi kabaakabiteejaku to.

<sup>335</sup> Nenu, bânà beetu, ndi ntekemena ne, paabalabo dyambulula dya aanyi maalu Dituku adi, Yèyè neakupule byanyi paanyi, mémè, ne kaakwelelaku nanshà meji ku byòbì piine apu to. Ndi ntekemena ne ncinudi nutekemena peenu, nwènù. Nzambi anubeneshe.

<sup>336</sup> [Docteur Tommy Hicks udi wamba maalu à dyela nsèkè àdì àlondà aa—Muf.]

[Ngeela meji ne tudi mwa kwamba mu dinda emu bwa kwenza cikoso cya byònsò bidi byambiibwe mu mèyì aa: Kilisto munda mwanyi ditekemena dya butumbi. Àmbààyi, bu nwènù mwa kuswa. Kilisto munda mwanyi ditekemena dya butumbi.]

[Kutu tuumaalu twa disunsulula ne twa disakidila mu nsòmbelu wa muntu yònsò. (Ncyakuditwa mu dyakula to.) Mémè ndi ne mukenji kampanda. Ndi ngiitabuuja ne mwena Kilisto yònsò utu ukaadiku. . . ? . . . Yesu . . . ? . . . Mwoyi wanyi mmusanguluke mu dinda emu, ne ndi ngiitabuuja ne bwa bààbùngì baa kutudi bintu kampanda bitù bitutacisha

abi...?...ki bìdì bitùvwijà balume ne bakaji baa Nzambi batambe kulengela.]

[Babe Ruth uvwa mumanyike bu Mfumu wa Dyela dya ndundu. Kadi nukaavwaku bamanye ne Babe Ruth mwine awu uvwa kabidi Mfumu wa Dipangila dya ndundu anyi? Wàkapangila kwela ndundu misangu yàbùngì kupita yivwàyeku mwele. Wàkapangila misangu 1.330; wàkeela anu 860 cyanaana. Kadi musangu wònsò uvwa Babe Ruth upangila, ùvwa walukila ku kazubu kàà mulongolodi wa dinaya pavwa mukulumpe mwedi wa kashiba wela lubila ne: “Wàpangìdì,” ùvwa walukila ku kazubu kàà mulongolodi wa dinaya udikupula byanza ne wambula mucu wa dituuta naawu ndundu awu ufunkuna kuulu kwa lupangu lwa tukanu, mwikale misangu yònsò wamba ne: “Ndi ngumvwila mwedi wa ndundu udi pààpa wawa luse.”]

[Kakwena bwalu bubi mu dipangila kwela ndundu to, kadi vuluka ne: ambula mucu wa dituuta naawu ndundu awu...?...bwalu Kilisto munda mwanyì nditekemena dya butumbi. Ambululaayi cyakabidi nanku bu nwènù mwa kuswa: Kilisto munda mwanyì ditekemena dya butumbi. Ki byònsò.]

Eyowa.

[Ki byònsò.]

Neya bushuwa.

[Ki byònsò.]

Byònsò. Amen.

[Aleluuyah. Dikokangana ne dilwishangana adi kì mbyàfikishà mudimu ku dyenjiibwawu to. Tukaadi pabwìpì menemene...]

Amen.

[...ku luseke lukwabo. Tukaadi bafike pa kaaba kaa katuyi mwa kwalukilaku to. Mmisangu bùngì kaayi yínkaadiku muumvwe kapiteena wàmbila bàdì paanyima mu ndeke ne: “Tukaadi bafike mpindyewu pa kaaba kaa katuyi mwa kwalukilaku to.”]

[Anu abidi adi panshi aa mvwa muumvwe díyì difumina mu buloba bukwabo bwabwa dyakula naanyi dyamba ne: “Mwanaanyi, wáfikì pa kaaba kaa kuyi mwa kwalukilaku to.” Mbwenà kwamba ne nkaadi pabwìpì menemene ne luseke lukwabo kutamba kaaba kàndì mwashile lwendu.]

[Bwita kwìsù, bu wêwè mwa kuswa; inyika mutu webe.]

[Taatù wetu wa mu Dyulu, mu dinda emu, mushindu mwine utudi ne kusakidila utudi ne kwanyisha mu mushindu wa tufika too ne ku dyamba byumukila mu ndondo wa myoyi yetu ne mu ndondo wa misuuka yetu ne: “Kilisto munda mwanyì—Kilisto munda mwanyì, ditekemena dya butumbi.” Kaa, Yesu, elaku maboko Ebe a dinanga awu kunshingu kwa mulume yònsò

ne kwa mukaji yônsò, ne swaku bwa lumono lwetu ne mèsù etu bibanduluke bitangile muulu—muulu, muulu menemene, muulu menemene kutamba bintu bya pa buloba ebu, bwa twamonaku Kilisto, ne bakwabo baamonaku Kilisto munda mwetu. Tentekaku cyanza Cyebe pa yônsò wa ku basadidi Beebe aba . . .]

Twënzèlèku nanku, Mukalenge.

[. . .swaku, patudi tupatuka mu mwaba ewu mu dinda emu bwa twikale mwa kupangadika bwa kubenga kumona cingà cintu pa kuumusha Kilisto nkaayende . . .]

Amen.

[. . .twakidilangana bilenga muntu ne mukwende munkaci mwetu. Tudi bamanye ne mudimu ukaadi—kudi mudimu munene be wa dyanza, Yesu; kudi dinowa dinene be dya bidi bikengela kunowa.]

Eyowa's, Mukalenge.

[Kaa, watukwacishaku's, Mukalenge . . .]

Eyowa's, Mukalenge.

[. . .bwa twaswikakajaku byanza byetu pamwe . . .]

Twënzèlèku nanku's, Mukalenge.

[. . .ne twenda tucila mu bya dinowa . . .]

Eyowa's, Mukalenge.

[. . .bwa kupeta bajimine ne badi bàpùnga ne lufu kumpala kwa dîbà kwikaladi dimane kupita.]

Eyowa's, Mukalenge.

[Ndi muswe bwa wëwè kwela cyanza cyebe muulu ne kutumbisha Dîna dya Mukalenge wetu Yesu Kilisto.]

[Tujuukilaayi kuulu, bu nwênù mwa kuswa. Ndi muswe nwèlè byanza byenu muulu ne nwîmbè pamwe naanyi *Ndi muMunange*. Nudi baMunange?]

Amen.

[. . .mu dinda emu anyi? Nudi baMunange ne mwoyi wenu wônsò anyi? Elaayi byanza byenu muulu ne nùwîmbè, bônso cyapamwe ne: *Ndi muMunange*.]

[Ndi muMunange, ndi muMunange,]

[Bwalu Yèyè wakannanga kumpala,]

[Ne wakampetela lupandu]

[Ku mucu wa Kalvariyo.]

[Wîmbilaayi anu mu matama bu nwênù mwa kuswa . . .]

[Nudi bamanye's, nwênù baanyaanaanyi bambi, mu Argentine tuvwa ne bantu bapite pa 400.000 mu disangisha dimwepele; ku musangu ne ku musangu tudi tumona anu bantu. Kadi ndi mvuluka mu mapingaja a ntwadijilu, tuvwa

ne bantu bapite pa 400.000 bàvwà bawimba mu ci-Espagnol, ki mèmè kubambila bwa kuwimbilabo mu matama, ne pabelu apu pavwa bantu bapite pa 300.000. Twêtù kwambila bantu bàvwà munda abu bwa kwanjibo kushaala bapuwe pavwa bantu bàvwà pabelu munkaci mwa dimbila mèyi a musambu awu mu matama apu. Ki dyakamwe, pavwabo munkaci mwa kuwimba apu, cintu kampanda e kupongolokaci munda mwa musuuka wanyi. Ncivwaku mwanji kumanya kwine kwònsò aku dibuulula dya Kilisto munda mwanyi to too ne pângààkuumvwà mèyi avwa atwa aaluka a bantu 300.000 bàvwà pabelu bimbila cyanaana mu matama *Ndi muMunange* pabelu paapa abu to...?... dinda edi ncilwilu cinene cya cikemesha cya Mukalenge wa butumbi, ne nyawu bimba. Udibo banange awu nganyi? Ûdi wêwè munange awu nganyi?]

Eyowa.

[Kilisto, Kilisto munda mwanyi.]

Eyowa.

[Ditekemena dya butumbi. Bwitaayi kwîsù, elaayi byanza byenu muulu, ne wimbàayi cyakabidi, bantu bònsò.]

Eyowa's, Mukalenge.


[Ndi muMunange, ndi muMunange,]

[Bwalu Yêyè wakannanga kumpala,]

[Ne wakampetela lupandu]

[Ku mucu wa Kalvariyo.]

[Pawikala muMunange mu dinda emu, ela maboko ebe kunshingu kwa bantu balume bashiilangane basatu anyi banaayi; ne bantu bakaji bènzè paabo cya mwomumwe; bāmbè ne: “Ndi munange Mukalenge Yesu Kilisto.” Ncya bushuwa; ela maboko ebe kunshingu. . . —Muf.]

<sup>337</sup> Bu mèmè mwa kumonaku cya nunku ewu cyènzeka pa buloba bujima, ndi mufwanyine kwamba ne: “Mukalenge, lekèlaku musadidi Webe aye byandi mu ditalala!” 

*BUNZAMBI BUUMVWIJA* LUA61-0425B

(The Godhead Explained)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diibidi mu dinda, mu matuku 25 a ngondo mwinayi, cidimu cya 1961, ku Holiday Inn mu Chicago, Illinois, U.S.A. Ndyumusha pa mukaba wa mayi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)